

UFALME WAKO UJE



Imani ya Kibahá'í na kutimia kwa
Ahadi ya Biblia



UFALME WAKO UJE

UFALME WAKO UJE

*Kijitabu hiki kimechapishwa na Kamati ya Vitabu, Uchapishaji na
Usambazaji ya Baraza la Kiroho la Kitaifa la Wabaha'i wa Tanzania
S.L.P. 585, Makongo Juu, Dar es Salaam, Tanzania.*

Simu: +255-685 637 422

*Barua Pepe: secretariat@bahai.or.tz.
literature@bahai.or.tz*

*Uhakiki wa Tafsiri ya Kiswahili na:
Kamati ya Uhakiki wa Tafsiri ya Kiswahili ya Kitaifa
ya Baraza la Kiroho la Kitaifa la Wabaha'i wa Tanzania*

Toleo la kwanza : 2007

Toleo la pili : 2020

© Baraza la Kiroho la Kitaifa la Wabaha'i wa Tanzania

1 KUJIANDAA KUMPOKEA YESU

1.1 Sala ya “Baba Yetu”

Yesu aliwafundisha wafuasi wake kusali, na katika sala ya “Baba Yetu” Yesu alituelekeza kila tunaposali kuomba Ufalme wa Mungu uje duniani:

Ufalme wako uje, mapenzi yako yatimizwe, hapa duniani kama huko mbinguni...LUKA 11:2

Sehemu kubwa ya Imani ya Kikristo ni kwamba Yesu atarudi tena kusimamisha Ufalme huu wa Mungu duniani, na Mkristo lazima awe akisubiri siku hii kwa shauku kubwa.

1.2 Angalia Na Uwe Umejiandaa!

Kuhusu wakati wa kuja Ufalme wa Mungu, Yesu alituambia kuwa saa haijulikani kabla, ila Baba tu:

Walakini habari ya siku ile na saa ile hakuna aijuaye, hata malaika walio mbinguni, wala Mwana, ila Baba peke yake. MATHAYO 24:36

Je, kama tumeambiwa kuwa hatuwezi kuijua saa ile kabla haijafika, ina maana kuwa tusihangaike kujiandaa? Hapana. Yesu Alisisitiza mara nyingi kwa lugha wazi na pia kwa mithali umuhimu wa Mkristo kutumia bidii kwenye kujiandaa kumpokea.

Angalieni, kesheni,[ombeni], kwani hamjui wakati ule utakapokuwapo. MARKO 13:33

Ni nani basi mtumishi mwaminifu na mwenye busara, ambaye bwana wake alimweka juu Nyumba yake, awape watu chakula kwa wakati wake? Heri mtumwa yule, ambaye bwana wake ajapo atamkuta akifanya hivyo.

MATHAYO 24:45-46

Nanyi muwe kama watu wanaomngojea bwana wao, atakaporudi kutoka harusini, ili atakapokuja na kubisha, wamfungulia mara. Heri watumwa wale, ambao bwana wao ajapo atawakuta wanakesha. Amin, nawaambieni, atajifunga na kuwakaribisha chakulani, atakuja na kuwahudumia. Na akija zamu ya pili, au akija zamu ya tatu, na kuwakuta hivi, heri watumwa hao. Lakini fahamuni neno hili, kwamba mwenye nyumba angalijua saa atakayokuja mwiv i, angalikesha, wala asingeliacha nyumba yake kuvunjwa. Nanyi jiwekeni tayari, kwa kuwa saa msiyodhani ndipo ajapo Mwana wa Adamu. LUKA 12:36-40

13. Sababu ya Kukesha

Wakristo wanapokesha, siyo tu kufanya zoezi la kutolala usingizi wa kimwili. Wakristo wanaambiwa kukesha kiroho ili kuweza kumtambua Yesu anaporudi.

Angalieni, kesheni,[ombeni], kwa kuwa hamjui wakati ule utakapokuwapo. Mfano wake ni kama mtu mwenye kusafiri, ameiacha nyumba yake, amewapa watumwa wake amri, na kila mtu kazi yake, naye amemwamuru bawabu akeshe.

MARKO 13:33-34

Kesheni basi, kwa maana hamjui ajapo bwana wa nyumba, kwamba ni jioni, au kwamba ni usiku wa manane, au awikapo jimbi, au asubuhi; asije akawasili ghafla akawakuta mmelala. Na hilo niwaambialo ninyi, nawaambia wote, kesheni.

MARKO 13:35-37

Walakini usipokesha, nitakuja kama mwivi, wala hutaijua saa nitakayokuja kwako.

UFUNUO 3:3

Kukesha ina maana ya kiroho. Ina maana ya kutoridhika; kutojiruhusu kulala usingizi kiroho. Tukiinyima miili yetu usingizi lakini bado tunashindwa kumtambua Yesu wakati wa kurudi Kwake, tumekesha bure.

1.3 Sifa za Kiroho Zinazohitajika

Siyo watu wote ambao wataweza kumtambua Yesu mara tu Atakapokuja, bali ni wale ambao wana sifa za kiroho zinazohitajika:

Tafuteni kwa bidii kuwa na imani na watu wote, na huo utakatifu, ambao hapana mtu atakayemwona Bwana asipokuwa nao.

WAEBRANIA 12:14

Atatokea mara ya pili, pasipo dhambi, kwa hao wamtazamiao kwa wokovu.

WAEBRANIA 9:28

Baadhi ya watu wenye imani wanajiamini mno kuwa wanazo sifa hizi. Lakini sifa moja inayohitajika sana kwa Mkristo anayetaka kuwa tayari kumtambua Bwana wake anaporudi ni unyenyekavu:

Naye mnyenyekavu Mungu atamwoko. AYUBU 22:29

BWANA huwalinda wasio na hila; Nalidhilika, akaniokoa. ZABURI 116:6

Utafuteni unyenyekevu; huenda mtafichwa katika siku ya hasira ya BWANA.

Mtafuteni BWANA, enyi nyote mlio wanyenyekevu wa dunia, ninyi mliozitenda hukumu zake. SEFANIA 2:3

Kwa kuwa BWANA awaridhia watu wake, Huwapamba wenye upole kwa wokovu. ZABURI 149:4

1.4 Kutumia Akili

Kuandaa kumpokea Bwana na kuangalia siyo kazi ya subira tu. Kama Mkristo hajalala usingizi (kiroho) na hajaridhika na ana bidii ya kutafuta Ufalme, lazima awe tayari kutumia akili yake kupima ukweli wa kila kitu:

Msitweze unabii; jaribuni mambo yote; lishikeni lililo jema. 1 WATHESALONIKE 5:20-21

Wapenzi, msiiamini kila roho, bali zijaribuni hizo roho, kwamba zimetokana na Mungu... 1 YOHANA 4:1

Tukitumia akili zetu kwa hekima na busara, tutaingia katika Ufalme wa Mungu:

Wengi watajitakasa, na kujifanya weupe, nakusafika; bali wabaya watatenda mabaya; wala hataelewa mtu mbaya awaye yote; bali wao walio na hekima watakaoelewa. DANIELI 12:10

Na walio na hekima watang'aa kama mwangaza wa anga... DANIELI 12:3

Wale waliokuwa wapumbavu walizitwaa taa zao, wasitwae na mafuta pamoja nao; bali wale wenye busara walitwaa mafuta katika vyombo vyao...[na kuingia katika harusi na bwana]. MATHAYO 25:3-4

Ni nani basi yule mtumwa mwaminifu mwenye akili, ambaye bwana wake alimweka juu ya nyumba yake...? MATHAYO 24:45

1.5 Nani watakuwa tayari?

Je, tunaweza kujua kabla ni nani watakuwa tayari kumtambua Bwana? Kama ni watu wa kanisa Fulani, ama madhehebu Fulani? Kama ni watu wanaoelewa aya Fulani kuwa na maana Fulani? Kama ni watu ambao wamebatizwa ama kubarikiwa kwa utaratibu Fulani?

Hebu, ni nani alipompokea Yesu Alipokuja mara ya kwanza? Tukisoma Agano la Kale, tunaona wazi kuwa wayahudi wengi hawakuona kuwa wangeweza kushindwa kumtambua masihi wao wakati wa kuja kwake. Makuhani, wasomi, na watu wengi ambao walikuwa wakijiona kuwa watu wenye haki na imani. Walikuwa wakiishi maisha yaliyoheshimika na jamii, na kujua kusoma na kukariri aya za Biblia, na kufuata sheria za Mungu. Lakini Alipokuja Yesu hawa wengi walishindwa kumjua Masihi wao, naye Hakuwakubali hawa. Wenzake Yesu walikuwa wavuvi wa samaki, Makahaba, wala rushwa, na wengine ambao Yeye Aliwaona kuwa na nia safi na unyenyekevu wa kumwamini.

Sisi Tumejifunza kutokana na historia. Anaporudi Yesu, siyo muhimu tena tunahudhuria kanisa gani, ama kuimba nyimbo gani, ama kudai kuwa tumeokoka ama la. Siyo muhimu kama tukionekana ni watu wenye imani au kuheshimika sana na jamii. Kitu muhimu ni kuwa sisi tupo tayari kusikia sauti Yake, kuwa na nia safi, na kuweza kumtambua kwa unyenyekevu kabisa ili naye akubali kutupokea kama wapenzi wake.

2. JINSI YA KUJA KWAKE

2.1 Yesu Mwenyewe Alieleza Maana ya ‘Kurudi’

‘**Kurudi**’ haina maana ya mwili ule ule bali roho; Yohana Mbatizaji alikuwa ni ‘kurudi’ kwa Eliya:

Wanafunzi wake wakamuuliza; wakisema, basi kwa waandishi hunena ya kwamba imepasa Eliya kuja kwanza? Naye akajibu, akawaambia, Kweli Eliya yuaja kwanza, naye atatengeneza yote; ila nawaambia, ya kwamba Eliya amekwisha kuja, wasimtambue, lakini wakamtenda yote waliyotaka. Vivyo hivyo Mwana wa Adamu naye yuaenda kuteswa kwao. Ndipo wale wanafunzi walipofahamu ya kuwa amesema nao habari za Yohana Mbatizaji.

MATHAYO 17:10-13

Yohana alikuwa kurudi kwa Eliya siyo kwa sababu ya mwili wake, lakini kwa kuwa aliendeleza kazi ya Eliya ya kuonya watu. Tusipoelewa maana ya kiroho ya ‘kurudi’ pia inawezekana kuwa ‘Yesu amekwisha kuja, tusimtambue.’

2.2 Atakuja Kwa jina Jipya

Hapo juu, Yesu alieleza kuwa Yohana alikuwa ni kurudi kwa Eliya kwa jina tofauti. Kwenye Biblia tunapewa kuelewa kuwa Yesu atakaporudi kutawala atakuja kwa Jina jipya, na hoja yake itakuwa na jina jipya ambalo halikujulikana awali:

Naja upesi. Shika sana ulicho nacho, asije mtu akaitwaa taji yako. Yeye ashindaye, nitamfanya kuwa nguzo katika hekalu la Mungu wangu, na jina la mji wa Mungu wangu, huo Yerusalemu

mpya, ushukao kutoka mbinguni kwa Mungu wangu, na jina langu mwenyewe, lile jipya. UFUNUO 3:12

*Na mataifa wataiona haki yako, na wafalme wote watauona utukufu wako; nawe utaitwa jina jipya litakalotajwa na kinywa cha BWANA.
ISAYA 62:2*

Nami nitampa jiwe jeupe, na juu ya jiwe hilo limeandikwa jina jipya asilolijua mtu ila yeye anayelipokea UFUNUO 2:17

Yesu kuja na jina tofauti ni jambo ambalo haliwezi kuhangaisha wafuasi wake wa kweli. Yesu amesema 'Mimi ni mchungaji mzuri.... Kondoo wangu wanafahamu sauti yangu'. Kondoo wa Yesu hawawezi kushindwa kumtambua akija na jina jipya na sura tofauti.

2.3. Atazaliwa kama Mtoto

Eliya alirudi kwa kuzaliwa duniani tena kwa wazazi wengine. Wakristo wengi huamini kuwa Yesu hatazaliwa tena duniani bali atashuka kutoka mbinguni:

Kwa sababu Bwana mwenyewe atashuka kutoka mbinguni pamoja na mwaliko, na sauti ya malaika, na parapanda ya Mungu...!
WATHESALONIKE 4:16

*Huyu Yesu aliyechukuliwa kutoka kwenu kwenda juu mbinguni, atakuja jinsi hiyo hiyo mlivyomwona akienda zake mbinguni.
MATENDO YA MITUME 1:1*

Lakini kusema kuwa Yesu atashuka kutoka mbinguni ina maana ya kiroho na siyo ya kimwili. Hata alipozaliwa mara ya kwanza kwa Mariam, Yesu alikuwa ameshuka kutoka mbinguni:

Wala hakuna mtu aliyepaa mbinguni, ila yeye aliyeshuka kutoka mbinguni, yaani, Mwana wa Adamu.

YOHANA 3:13

Yesu pia atakaporudi kwa Utukufu wa Baba atazaliwa kama mtoto:

Maana kwa ajili yetu mtoto amezaliwa, tumepewa mtoto mwanaume; na uwezo wa kifalme utakuwa begani mwake; Naye ataitwa jina lake, Mshauri wa ajabu, Mungu mwenye nguvu, Baba wa milele, Mfalme wa amani. Maongeo ya enzi yake na amani Hayatakuwa na mwisho kamwe, katika kiti cha enzi cha Daudi na ufalme wake; Kuuthibitisha na kuutegemeza, kwa hukumu na kwa haki, Tangu sasa na hata milele. Wivu wa BWANA wa majeshi ndio utakaotenda hayo.

ISAYA 9:6-7

Aya hii ya juu inahusu utawala wa Baba wa milele, siyo kuja kwake Yesu mara ya kwanza kama Mwana.

Pia Yesu anaita wakati wa kurudi kwake “Siku za Mwana wa Adamu” (k.m. LUKA 17:26) akisisitiza kuwa atakuja kama binadamu.

2.4 Atakuja kama mwivi usiku

Mithali inayotumika mara nyingi kutueleza kuhusu kuja kwa Yesu mara ya pili ni “kama mwivi usiku”

Maana ninyi wenyewe mnajua yakini ya kuwa siku ya Bwana yaja kama mwivi ajavyo usiku. 1 WATHESALONIKE 5:2

Lakini siku ya Bwana itakuja kama mwivi. 2 PETRO 3:10

Walakini usipokesha, nitakuja kama mwivi, wala hutajua saa nitakayokuja kwako. UFUNUO 3:3

Je, mwivi usiku ana tofauti gani na jambazi mchana? Jambazi mchana anakuvamia, lakini unamwona na unajua kwa hakika kuwa umevamiwa. Lakini ukilala usiku, mwizi anafika na kukuvamia na kuondoka na huna habari. Kwa kutumia mithali hii, Yesu ametuonya kuwa Yeye atakuwa amefika bila watu wengine kuelewa kuwa ameishakuja. Watu wengine wanaendelea na usingizi wao wa kiroho.

2.5. Kurudi kwa Yesu na Kusimamishwa kwa Ufalme wa Mungu Utatokea Hatua kwa hatua

Tunaweza kudhani kuwa Yesu atakaporudi dalili zote zitatokea kwa siku moja. Lakini Petro, akizungumzia siku ya hukumu, anatukumbusha kuwa siku hii si lazima iwe siku ya saa ishirini na nne, bali inaweza kuwa kipindi cha miaka elfu moja:

Lakini, wapenzi, msilisahau neno hili, kwamba kwa Bwana siku moja ni kama miaka elfu, na miaka elfu kama siku moja. 2 PETRO 3:8

Kwenye LUKA 17, Yesu mwenyewe anatueleza kuwa atakaporudi atateseka kwanza. Wengi watakataa kumtambua kama walivyomkataa Nuhu:

Ndivyo atakavyokuwa Mwana wa Adamu katika siku yake. Lakini kwanza, hana budi kupata mateso mengi, na kukataliwa na kizazi hiki. Na kama ilivyokuwa siku ya Nuhu, ndivyo itakavyokuwa katika siku zake Mwana wa Adamu.

LUKA 17:24-26

Baada ya gharika ya siku ya hukumu, watu wote watamtambua Yesu kwa jina lake Jipya. Yesu alitoa methali mbili, moja ya punje ya haradali (LUKA 13:18-19) na nyingine ya chachu (LUKA 13:20-21) kueleza kuwa Ufalme wa mbinguni ungeanza kama kitu kidogo sana lakini mwisho ungekuwa mkubwa kuenea dunia nzima.

3. DALILI TATU ZILIZOTOLEWA NA YESU

Kurudi kwa Yesu kutakuwa lini? Yesu mwenyewe kwenye Injili alitoa dalili tatu ambazo alisema zingeonyesha kuwa wakati wake umefika:

Wanafumzi wake wakamwendea kwa faragha, wakisema, Tuambie, mambo hayo yatakuwa lini? Nayo ni nini dalili ya kuja kwako, na mwisho wa dunia?

MATHAYO 24:3

3.1. Vita

Dalili ya kwanza iliyotolewa na Yesu ni vita:

Mtasikia habari za vita na matetesi ya vita... kwa maana taifa litaondoka kupigana na taifa, na ufalme kupigana na ufalme; kutakuwa na njaa, na matetemeko ya nchi mahali mahali. Hayo yote ndiyo mwanzo wa utungo.

MATHAYO 24:6-8

Je, dalili hii imeshaonekana? Ndiyo vita zimekuwepo miaka yote, lakini karne hii imekuwa tofauti na miaka ya nyuma. Vita viwili katika karne hii vimepiganisha nchi zote za dunia. Idadi ya watu waliokufa katika vita vya karne hii ni kubwa kuliko waliokufa kwa vita katika historia nzima ya binadamu. Fungua redio siku moja na habari na matetesi ya vita vipo kila siku.

Dalili hii ya kwanza kwa kweli imeishaonekana.

3.2 Injili itahubiriwa kwa Mataifa yote

Dalili hii ya pili inayotolewa na Yesu ni Injili kuhubiriwa ulimwenguni pote:

Tena habari njema na ufalme itahubiriwa katika ulimwengu wote, kuwa ushuhuda kwa mataifa yote; hapo ndipo ule mwisho utakapokuja.

MATHAYO 24:14

Na sharti injili ihubiriwe kwanza katika mataifa yote. MARKO 13:10

Je, utabiri huu umeishatimilika? Wasomi wengi wanakubaliana kuwa sharti hii ilitimizwa katika miaka ya 1800's. kwa mfano kwenye mwaka 1804 Chama cha Biblia cha Uingereza na Nchi za Kigeni kilitangaza kuwa wameishatoa 'nakala 421 milioni za Biblia kwenye kila nchi iliyojulikana duniani.'

Kwenye mwaka 1842, Bandari tano za China zilifunguliwa kwa biashara na kupokea wamisionari wa Kikristo.

Watu wengi wanahesabu safari za Dr. Livingstone kutoka Zanzibar na kuingia katika kiini cha bara la Afrika kuanzia 1842 kuwa kitendo kilicholeta injili kwa sehemu ya mwisho duniani kuguswa na Injili.

Dalili ya pili nayo imeshaonekana

3.2. Wayahudi Watarudi Israel

Kwenye Injili ya Mtakatifu Luka, tunaambiwa tena kuwa wanafunzi wake wakamuuliza Yesu:

Mwalimu, mambo hayo yatakuwa lini? Nayo ni nini ishara ya kuwa mambo hayo ya karibu kutukia: LUKA 21:7

Na Yesu akawajibu na ishara nyingine:

Kutakuwa na shida nyingi katika nchi na hasira juu ya taifa hili [Israeli].

Wataanguka [wanaisraeli] kwa ukali wa upanga, nao watatekwa nyara na kuchukuliwa katika mataifa yote; na Yerusalemu utakanyagwa na Mataifa, hata majira ya Mataifa yatakapotimia. hapo watakapomwona Mwana wa Adamu akija katika wingu pamoja na nguvu na utukufu mwingi. LUKA 21:23-24, 27

Yerusalemu ulibomolewa na Titus wa Roma kwenye mwaka 70 A.D na Wana wa Israeli walisambaratika katika nchi mbalimbali. Yerusalemu uliendelea kutawaliwa na mataifa mbalimbali kwa miaka mingi. Halafu mwaka 1844, Ufalme wa Uturuki ulilazimishwa na Uingereza kutangaza “Amri ya Ustahimilivu” kwa kuwaruhusu Wayahudi kurudi Israeli. Hivyo mwaka 1844 nguvu ya mataifa kukanyaga Israeli badala ya Wayahudi ikaisha na Wayahudi wakaanza kurudi kujenga nchi yao tena.

Hivyo kuanzia mwaka 1844 dalili hii pia ilitimilika.

4. MWAKA 1844

Mwaka 1844 umepewa umuhimu sana na wasomi wa Biblia kwenye uelewa utabiri juu ya kurudi kwa Bwana.

Kwenye Agano la Kale, kuna sehemu 5 zinazoonyesha mwaka 1844 kuwa mwaka wa kuja wa Baba wa milele. Kwenye Agano jipya, kuna sehemu 10 zinaonyesha mwaka huo huo.

Hivi karibuni, kuna kitabu kimechapishwa na mtungaji mmoja wa Kikristo kiitwacho “Mwaka wa Bwana: 1844” na ambacho kinaeleza kuhusu watu wengi sana wa nchi, na makanisa mbalimbali ambao wote waliamini mwaka 1844 kuwa mwaka wa kurudi kwa Yesu.

Watu wengine hawaoni umuhimu wa kujaribu kutafsiri na kuelewa Aya hizi kwa kuwa wanasema kuwa siri yake iko kwa Mungu hadi siku ya hukumu. Lakini kama siku ya hukumu ni kama miaka elfu moja (1 Petro) pengine siku hii imeshaanza na uwezo wa kuelewa hizi Aya umeshafunguliwa na Mungu.

Kupitia aya hizi zote ingechukua muda mkubwa sana, kwa hiyo tutaweka uzito zaidi kwenye kuangalia moja nzito sana. Utabiri wa Danieli una umuhimu wa kipekee kwa sababu mbili:

Kwanza, utabiri wa Danieli unaonyesha wazi kabisa mwaka wa kuja kwa Yesu mara ya kwanza, na kwa kutumia mbinu hizo hizo unaonyesha pia mwaka wa kurudi.

Pili, Yesu mwenyewe aliwaambia wafuasi wake, walipomuuliza, kuangalia utabiri wa Danieli kuhusu kutakaswa kwa patakatifu.

Basi hapo mtakapoliona chukizo la uharibifu, lile lililonenwa na nabii Danieli, limesimama katika patakatifu (asomaye na afahamu) MATHAYO 24:15

Kwa kufuatia haya maelekezo ya Yesu, ebu tusome utabiri huu wa Danieli. Tukumbuke kuwa Bwana Yesu asingetuamuru kutumia utabiri wa Danieli kama isingewezekana kuuelewa.

4.1 Utabiri wa Danieli juu ya Kuja Mara ya Kwanza

Mwanzo wa maombi yako ilitolewa amri, nami nimekuja kukupasha habari, maana wewe unapendwa sana; basi itafakari habari hii, na kuyafahamu maono haya, muda wa majuma sabini umeamriwa juu ya watu wako, na juu ya mji wako mtakatifu, ili kukomesha makosa, na kuishiliza dhambi, na kufanya upatanisho kwa ajili ya uovu, na kuleta haki ya milele, na kutia muhuri maono na unabii, na kumtia mafuta yeye aliye mtakatifu. Basi ujue na kufahamu, ya kuwa tangu kuwekwa amri ya kutengeneza na kuujenga upya Yerusalemu hata zamani zake masihi aliye mkuu, kutakuwa na majuma saba... na baada ya yale majuma sitini na mawili, masihi atakatiliwa mbali..DANIEL 9:23-26 (kwa kifupi, sehemu hii inajulikana kuwa “utabiri wa majuma 70 wa Daniel’)

Kwa kueleza utabiri wa Danieli, tunahitaji kujua kuwa tabiri zake zinaanzia mwaka ambapo Amri ya Tatu kwa kujengea Yerusalemu upya ilitolewa yaani 457 B.C

Pia, tunahitaji kujua kwamba, kwa lugha ya unabii, siku moja ina thamani ya Mwaka mmoja:

Siku moja kwa mwaka mmoja nimekuagizia. EZEKIEL 4:6

Kwa hesabu ya hizo siku mlizozipeleleza ile nchi, yaani siku arobaini kila siku hesabu mwaka... HESABU 14:34

Timiza siku zake saba, nasi tutakupa huyu naye kwa utumishi utakaonitumikia miaka saba mingine. MWANZO 29:27

Hivyo majuma sabini ni siku 7 mara 70 ama siku 490 ambazo kwa lugha ya unabii ni miaka 490

Tukianza mwaka wa kujenga upya Yerusalemu Daniel ametuonyesha muda wake hadi kuja, halafu kifo cha Yesu:

457 B.C. + 33 A.D. = miaka 490.

4.2 Utabiri wa Danieli Juu ya Kuja Mara ya Pili

Ndipo nikamsikia mtakatifu mmoja akinena, na mtakatifu mwingine akamuuliza huyo aliyenena, Haya maono katika habari ya sadaka ya kuteketezwa ya daima, na lile kosa lifanyalo ukiwa, yataendelea hata lini, kukanyagisha patakatifu na jeshi? Akamwambia, hata nyakati za jioni na asubuhi elfu mbili na mia tatu, ndipo patakatifu patakapotakaswa. DANIELI 8:13-14

(Kwa kifupi, sehemu hii inajulikana kuwa “utabiri wa miaka 2300 wa Daniel”)

Nyakati za jioni na asubuhi ni siku. Siku 2300 ni sawa na miaka 2300. Daniel anatumieza kuwa baada ya 2300 kuanzia na kujengwa upya Yerusalemu kuteketezwa kwa Yerusalemu itakwisha. Na Yesu amesema miaka hiyo inapokwisha, ndiyo wakati wa kuja kwake:

457 B.C. + 1843= 2300

Kwa sababu Kalenda ya Kikristo ilianzia na mwaka mmoja na siyo sifuri, miaka 2300 baada ya mwaka 457 ni mwaka 1844 ambao ni mwaka ule ule ilipotolewa “amri ya Ustahimilivu” kwa Wayahudi kurudi Israeli.

Msemaji mmoja wa Kanisa la Wasalio anasema:

“...kutokana na tabiri zote za wakati, Yesu angeweza kurudi duniani wakati wowote kuanzia mwaka 1844. Yeye hasubiri tena kutimia kwa kipindi chochote cha unabii. Hakuna utabiri wa wakati unaomzuia tena. Kwa hiyo mbona Hajarudi?”

4.3 Kutumika kwa Tarehe za Kiislam Kwenye Biblia

Pamoja na aya za Biblia zinazoonyesha mwaka 1844 kuwa wakati wa kuja kwa Ufalme wa Mungu duniani, kuna Aya zingine zinazotumia tarehe za Kiislam, hasa kwenye Kitabu cha Ufunuo wa Yohana. Mwaka 1260 A.H. wa Kiislam ni mwaka 1844 kwa kalenda ya Kikristo. Kwa mfano:

Nami nitawaruhusu mashahidi wangu wawili, nao watatoa unabii siku elfu moja mia mbili na sitini UFUNUO 11:3

Naye akapewa kinywa cha kunena maneno makuu, ya makufuru. Akapewa uwezo wa kufanya kazi ya miezi arobaini na miwili. UFUNUO 13:5

42 x siku 30 = 1260 ama miaka 1260

Aya hizi zote mbili zinahusu ufunuo wa Kiislam ambao muda uliopangiwa na Mungu ulikuwa ni miaka 1260 kuishia mwaka 1844

Kutokana na ushahidi huu wote, wakristo wengi sana (na pia Waislam wengi) walikuwa wakiamini kuwa mwaka 1844 ungekuwa ni mwaka wa kurudi kwa Yesu. Lakini hawakuona kitu chochote kwa macho yao? Baada ya mwaka 1844 kupita, wakristo wengine walikata tamaa na kuona kuwa Yesu alikuwa amechelewa kuja. Lakini Biblia inasema kuwa Yesu hatachelewa:

*Kwa kuwa bado kitambo kidogo sana, Yeye atakuja, wala hatakawia...
WAEBRANIA 10:37*

Je nanyi mmekosea kwenye kuelewa utabiri wa Biblia? Je, kuna chochote kilichotokea mwaka 1844?

5. MADAI YA BAHÁ'U'LLAH

Yesu alipozaliwa na kulazwa na mama yake kwenye hori la kulia ng'ombe, ni binadamu wachache sana waliojua kuwa matokeo makubwa yenye umuhimu kwa binadamu wote. Sasa kwa kuangalia nyuma, tunaweza kutambua umuhimu na utukufu wake. Wabaha'i huamini kuwa, kama wakristo wengi walivyotegemea, mwaka 1844 pia ulileta matokeo ambayo yatabadilisha historia ya dunia na binadamu wote.

Mwaka 1844, kwenye mji wa shiraz, huko Uajemi (Iran), kufika kwa Mwahidiwa wa Biblia na kuanzishwa kwa Ufalme wa Mungu duniani kulitangazwa katika chumba kimoja cha juu cha nyumba ya kawaida, katika hali isiyotofautiana sana na ile hali ya kuzaliwa kwa Yesu. Binadamu wanaojua umuhimu wake ni wachache, lakini wanaongezeka kila siku. Mwaka 1844 ni mwaka wa mwanzo wa Imani ya Kibaha'i.

Je, Mkristo mwenye nia ya kutimiza amri ya Yesu kukesha na 'kumfungulia mara anapobisha' anaweza kushindwa kupeleleza ukweli wa madai ya Imani ya Kibaha'i? hawezi kushindwa. Mtu ambaye amekuja mwaka 1844 na kudai kuwa Yeye ni kurudi kwa Yesu ni mmoja tu, na amekuja na madai wazi na mathibitisho ya kutosha.

5.1 Historia Fupi ya Bab na Baha'u'llah

Kwenye usiku wa May 22, 1844, kijana mmoja anayejulikana kwa jina la 'Bab' (maana yake 'Lango') alitangaza huko Irani kuwa Siku iliyoahidiwa na Mwenyezi Mungu katika dini zote ilikuwa imeanza, na kwamba Yeye alikuwa ametumwa na Mungu kuandaa njia ya kuja Kwake Mwahidiwa wa dini zote. Bab alifundisha ujumbe huu kwa miaka sita, na wafuasi

wake walikuwa wengi. Mwisho Bab na wafuasi wake 20,000 waliuawa na serikali ya Shah na makasisi huko Iran. Alifariki akiwa na umri wa miaka 33.

Baada ya miaka michache, wafuasi wengi wa Bab waliobaki walikuja kumtambua Baha'u'llah kuwa huyu ndiye Mwahidiwa. Baha'u'llah alizaliwakwenye familia tajirinchini Irani. Babayake Baha'u'llah alikuwa waziri. Baha'u'llah mwenyewe alikuwa mwenye tabia ya upole, takatifu na karimu. Hakujishughulisha na mambo ya siasa wala kutafuta mali. Baha'u'llah alitambua ujumbe wa Bab sawa na Yesu alivyotambua hoja ya Yohana. Baada ya kifo cha Bab, Baha'u'llah alifungwa gerezani kwa shitaka la uongo na mwisho akafukuzwa nchini na kuhamishiwa Baghdad, mwishowe Israel; kwa amri ya Mfalme wa Uturuki.

Baha'u'llah alikuwa ni mfungwa sehemu kubwa ya maisha yake, lakini katika miaka hii yote alikuwa akifunua aya na Vitabu vya Mungu kuongoza binadamu kwa karne zinazokuja. Baha'u'llah aliagiza kuwa makao ya Imani yangesimamishwa kwenye Mlima Karmeli huko Israeli. Baha'u'llah alifariki dunia mei 29 mwaka 1892 akiwa na umri wa miaka 75.

Kwa kweli, kuja kwake Baha'u'llah kumekuwa ni kama mwivi usiku. Baha'u'llah alijitangaza, kufundisha, kuteseka sana, na kuweka msingi wa Ufalme wa Mungu duniani, halafu kuondoka bila sehemu kubwa ya binadamu kujua ama kutambua.

Maisha ya Baha'u'llah yametimiza Aya nyingi za utabiri kwenye Biblia kwa njia tofauti na mategemeo ya watu. Kwa mfano, maono ya Daniel juu ya kurudi kwa Bwana yaliyotokea Elamu (Iran).

Nami niliona katika maono; ilitukia, nilipoona, nalikuwako huko Shushani ngomeni, katika wilaya ya Elamu...DANIEL 8:2

Na pia imeandikwa kuwa ufalme wa Mungu utaanzia Elamu au Iran:

Nami nitaweka kiti changu cha enzi huko Elamu, nami nitawaharibu mfalme na wakuu, watoke huko, asema BWANA. YEREMIA 49:38

Baha'u'llah ameandika kuwa nchi ya Irani ni kama 'Mama wa Dunia' kwa kuwa Ufunuo wake ulianza huko.

Pia Biblia inasema kuwa Utawala wa Mungu ungewekwa kwenye Mlima wake ambao ni Karmeli huko Israeli.

Walishe watu wako kwa fimbo yako, kundi la urithi wako, wakaao peke yao, mwituni katikati ya Karmeli. MIKA 7:14

Naam, kwa shangwe na kuimba; litapewa uzuri wa Lebanoni, utukufu wa Karmeli na Sharoni; watauona utukufu wa BWANA, ukuu wa Mungu wetu. ISAYA 35:2

Je, kiti cha enzi cha Mungu kinawezaje kuanzia Iran na kuja Israeli? Biblia inatuambia kuwa mwahidiwa mwenyewe atatokea Elamu (mashariki) na kuja Israeli; na kwamba wakati wa kuja atakuwa akitoa neno la Mungu kwa sauti yake:

Na tazama, utukufu wa Mungu wa Israeli ulitokea kwa njia ya mashariki, na sauti yake ilikuwa kama mshindo wa maji mengi. EZEKIEL 43:2

Tena Maana ya neno “Baha’u’llah ni “Utukufu wa Mungu”. Kwenye aya hii Anatajwa kwa jina.

Baha’u’llah alitoka Iran na kufika kusimamisha Imani yake kwenye Mlima Karmel siyo kwa nguvu na uamuzi wake, lakini akiwa mfungwa kwa nguvu na nia za Mwenyezi Mungu.

5.2 Kurudi kwa Yesu kwenye Utukufu wa Baba

Baha’u’llah alijitangaza wazi kuwa Yeye ni kurudi kwa Yesu. Kama Yohana alivyokuwa ni ‘kurudi’ kwa Eliya, Baha’u’llah ametangaza wazi kuwa ‘kurudi’ kwa Yesu ‘kwenye Utukufu wa Baba’. Katika waraka mmoja wa Baha’u’llah unaojulikana kama ‘waraka kwa Wakristo’ Baha’u’llah amesema:

Sema, Enyi wafuasi wa Mwana (Yesu)! Mmejifungia mbali nami kwa sababu ya Jina Langu? Mbona hamtafakari katika mioyo yenu? Mchana na usiku mmekuwa mkimwita Bwana wenu, kwa utukufu wake mkubwa, mligeukia pembeni na kubaki mmezama katika uzembe.

Enyi mapadre! Acheni kengele, na tokeni nje ya makanisa yenu. Mnapaswa, katika siku hii, kulitangaza kwa nguvu Jina Kuu kati ya mataifa. Mnapendelea kukaa kimya, wakati kila jiwe na kila mti vikisema kwa sauti kubwa: ‘Bwana amekuja katika utukufu wake mkubwa!’.

Mwanga huu umeinuka kutoka mashariki, na ulisafiri magharibi, hadi ulipofikia jioni ya maisha yake. Niambie kwa hiyo: wana wanamtambua Baba, na kumkiri, ama wanamkana, hata kama watu wa awali walivyomkana?

5.3 Kuleta Jina Jipya

Kwenye somo 2.2 tulijifunza kuwa Mwahidiwa atakuja na jina jipya:

Na mataifa wataiona haki yako, na wafalme wote watauona utukufu wako; nawe utaitwa kwa jina jipya litakalotajwa na kinywa cha BWANA.

ISAYA 62:2

Baha'u'llah hajatumia jina la Yesu, bali amekuja na jina jipya:

Enyi Wayahudi! Kama mmedhamiria kumsulubisha kwa mara nyingine tena Yesu, Roho ya Mungu. Niuweni Mimi, kwa kuwa tena, katika nafsi Yangu, amedhihirishwa kwenu.... Ingawa jina langu siyo jina lake.

Jina jipya la Mwahidiwa ni “Baha'u'llah” (Utukufu wa Mungu). Pamoja na kuwa jina jipya la Mwahidiwa lilikuwa limefichwa, linatajwa kwenye Biblia:

Na tazama, utukufu wa Mungu wa Israeli ulitokea kwa njia ya mashariki, na sauti yake ilikuwa kama mshindo wa maji mengi.

EZEKIEL 43:2

Akanichukua katika Roho mpaka mlima mkubwa, mrefu, akanionyesha ule mji mtakatifu, Yerusalem, ukishuka kutoka mbinguni kwa Mwenyezi Mungu; wenye Utukufu wa Mungu, na mwangaza wake ulikuwa mfano wa kito chenye thamani kubwa..

UFUNUO 21:10-11

Wanaomtambua Baha'u'llah nao wamepewa jina jipya. Yeye huwaita “Watu wa Baha” ama “Wabaha'i”.

Andamaneni na watu wote, Enyi watu wa Baha, katika roho ya urafiki na uenzi. Kama mnafahamu ukweli Fulani, kama mkiwa na johari, ambayo wengine wamenyimwa, shirikianeni nao hivyo katika lugha ya wema halisi na nia njema. Kama ikikubaliwa, kama ikitimiza madhumuni yake, kusudi lenu limefikiwa. Kama yeyote akiikataa, mwacheni mwenyewe alivyo, na mumsihini Mungu kumuongoza.

5.4 Kukusanya Kondoo Wote

Mwahidiwa anapokuja, miongoni mwa kazi zake ni kukusanya watu wa aina mbalimbali katika hoja moja.

Katika siku ile, asema BWANA, nitamkusanya yeye achechemeaye, na nitamrudisha yeye aliyefukuzwa, na yule niliyemtesa. MIKA 4:6

Na kondoo wengine ninao, ambao si wa zizi hili (siyo wakristo); na hao nao imenipasa kuwaleta; na sauti yangu wataisikia; kisha kutakuwa na kundi moja na mchungaji mmoja. YOHANA 10:16

Tayari Imani ya Kibaha'i imewakusanya watu zaidi ya milioni tano kutoka kila asili, kila dini, na kila taifa kwenye kundi moja. Baha'u'llah ametambulika kuwa Bwana wa wakristo, waislamu, wahindu, wabudha, wayahudi, wamajusi na watu wenye imani za kiasili.

Baha'u'llah amesema:

“Kile ambacho Bwana ameamuru kama dawa kuu na chombo cha nguvu kabisa kwa uponyaji wa ulimwengu mzima ni muungano wa watu wake wote katika Hoja moja ya watu wote, Imani moja ya wote. Hii kwa vyovyote haiwezekani kutimizwa isipokuwa kwa njia ya nguvu za Tabibu stadi, mwenye nguvu zote na aongozwaye na Mungu. Hii, kwa hakika, ndio ukweli, na vingine vyote ni bure na makosa.”

Na pia

“Siku inakaribia wakati watu wote wa ulimwengu watakapo kuwa wamechagua lugha moja ya watu wote. Wakati jambo hili litakapokuwa limetimizwa, kwenye mji wowote mtu atakaoweza kusafiri, itakuwa kama anaingia nyumbani kwake mwenyewe. Mambo haya ni sharti na ya lazima kabisa. Imembidi kila mtu wa busara na fahamu kujitahidi kutafsiri yale ambayo yameandikwa katika ukweli kupitia vitendo.”

5.5 Kuanzisha Utaratibu wa Utawala wa Mungu Duniani

Mwahidiwa atakapokuja anatakiwa kuleta utaratibu mpya wa utawala duniani.

Hawatajitaabisha kwa kazi bure, wala hawatazaa kwa taabu; kwa sababu wao ni wazao wa hao waliobarikiwa na BWANA, na watoto wao pamoja nao.

ISAYA 65:23

Naye atafuta kila chozi katika macho yao, wala mauti haitakuwepo tena; wala maombolezo, wala kilio, wala maumivu hayatakuwepo tena; kwa kuwa mambo ya kwanza yamekwisha pita. UFUNUO 21:4

Baha'u'llah amelea utaratibu mpya wa utawala duniani ambao utaleta haki na kubadilisha hali ya binadamu.

“Uzani (utengemano) wa ulimwengu umepinduliwa kwa kupitia nguvu ya kutetemesha ya Utaratibu huu mkuu kabisa wa Ulimwengu, mpya. Maisha yaliyotengemaa ya binadamu yamepinduliwa kwa kupitia nguvu ya Utaratibu huu wa kipekee, na wa ajabu – ambao mfano wake macho ya binadamu hayajawahi kushuhudia.”

Na pia

Sema: Hii ni Mizani isiyoweza kukosea ambayo Mkono wa Mungu umeishika, ambamo wote walio mbinguni na wote waliomo duniani hupimwa, na hali yao kuamuliwa, ikiwa nyinyi ni kati ya wale waaminio na kutambua ukweli huu.

5.6 Madai Yake Yako Wazi

Watu ambao hawajawahi kusikiliza vizuri madai ya Baha'u'llah wanaweza kufikiri kuwa yeye ni kama kiongozi wa madhehebu tu au hata nabii. Lakini siyo hivyo. Baha'u'llah ameweka wazi sana madai yake kuwa Mwahidiwa wa dini zote, Baba wa milele, na mchungaji mmoja wa kundi moja. Ni jukumu la kila muumini kupeleleza madai hayo.

Baha'u'llah amesema:

“Hakika Mimi nasema, hii ndiyo ile siku ambamo binadamu wanaweza kuutazama Uso, na kusikia sauti ya Mwahidiwa. Mwito wa Mungu umepaazwa na nuru ya uso Wake imeinuliwa juu ya watu. Inabidi kila mtu kufutulia mbali dalili ya kila neno la upuuzi kutoka ubao wa moyo wake, na kutazama, kwa unyofu na uadilifu, juu ya ishara za Ufunuo Wake, mathibitisho ya Ujumbe Wake na alama za utukufu Wake.”

Na pia

“Nashuhudia, enyi marafiki, kuwa msaada umekamilika..... Uthibitisho uko wazi, na ushahidi umeonekana.”

6. KUFUNGULIWA KWA VITABU KILICHOFUNGWA

6.1 Ahadi ya Kufunguliwa kwa Vitabu

Baadhi ya wakristo hawaoni sababu ya kujisumbua kusoma na kujaribu kuelewa unabii kwenye Biblia kwa sababu wanajua kwamba siri zote za siku za mwisho hazitajulikana hadi wakati wake.

Walakini habari ya siku ile na saa ile hakuna aijuaye, hata malaika walio mbinguni, wala Mwana, ila Baba peke yake. MATHAYO 24:36

Somo moja linalorudia tena na tena kwenye Biblia ni kwamba maneno juu ya siku ya hukumu yamefungwa; lakini yatafunguliwa na Mwahidiwa atakapokuja.

Kwenye kitabu cha Isaya:

Maneno Yamefungwa

Na maono yote yamekuwa kwenu kama maneno ya chuo kilichotiwa muhuri. ISAYA 29:11

Maneno Yatafunguliwa

Na katika siku hiyo viziwi watasikia maneno ya hicho chuo, na macho ya vipofu yataona katika upofu na giza wanyenyekevu nao wataongeza furaha yao katika BWANA, na maskini katika wanadamu watafurahi katika Mtakatifu wa Israeli. ISAYA 29:18-19

Na pia katika kitabu cha Daniel:

Maneno Yamefungwa

Akasema, enenda zako, Daniel; maana maneno haya yamefungwa, na kutiwa muhuri, hata wakati wa mwisho.
DANIEL 12:9

Maneno Yatafunguliwa

Na nikatazama hata viti vya enzi vikawekwa, mmoja Aliye Mzee wa Siku ameketi...hukumu ikawekwa, na vitabu vikafunuliwa.
DANIEL 7:9,10

Na pia Kwenye Ufunuo wa Yohana:

Maneno Yamefungwa

Kisha nikaona katika mkono wa kuume wake yeye aliyeketi juu ya kile kiti cha enzi kitabu kilichoandikwa ndani na nyuma, kimetiwa mihuri saba...nami nikalia sana kwa kuwa hapakuonekana mtu astahiliye kukifungua hicho kitabu, wala kukitazama.
UFUNUO 5: 1,4

Maneno Yatafunguliwa

Nao wakaimba wimbo mpya: "wewe unastahili kuichukua hati na kuifungua mihuri yake. kwa sababu wewe uliuwawa na kwa damu yako ukamnunulia Mungu watu Kutoka katika kila kabila na kila lugha; watu wa kila jamaa na kila taifa..."
UFUNUO 5:9

Wakristo ambao hawaamini kuwa Yesu amesharudi pia wasingedai kuelewa maana ya Aya hizo juu ya Siku yake, kwa kuwa Biblia inasema zimefungwa na muhuri hadi kuja kwake.

Lakini kutokana na kuja kwake Baha'u'llah, Wabaha'i huamini kuwa maana ya Vitabu hivi vimeshafunuliwa naye. Kwenye Vifungu vinavyofuata tutaangalia Baha'u'llah alivyofungua Aya hizo.

6.2 afsiri ya Kitabu cha Yakini cha Baha'u'llah

Kama tunavyojua, Biblia siyo kitabu kimoja bali ni mkusanyiko wa vitabu vingi ambavyo vinaendana kuleta kitabu ama Chuo Kimoja. Pia kwenye Ufunuo wa Kibaha'i, Baha'u'llah hajafunua kitabu kimoja bali vitabu na nyaraka nyingi ambazo kwa pamoja ni “kitabu” ama Ufunuo wake.

Miongoni mwa vitabu muhimu sana vya Baha'u'llah ni kitabu kiitwacho “Kitab-i-Iqan” ama “Kitabu cha Yakini”. Kitabu cha Yakini ni kitabu ambacho kina umuhimu wa kipekee katika kufungua na kufunulia maana ya aya na utabiri kutoka kwenye vitabu vya Mungu vya awali. Kitabu hiki kizima kilifunuliwa kwa muda wa mchana kutwa mbili na usiku mbili.

Kitab-i-Iqan kinaeleza kuwa wanadamu hushindwa kuelewa maana ya utabiri wa Mwenyezi Mungu kwa kosa la kufananisha lugha ya Mwenyezi Mungu na lugha ya binadamu. Mwenyezi Mungu Anapotoa mfano, sisi mara nyingi hung'ang'ania mfano na kusahau somo lenyewe. Mwenyezi Mungu Anapoongea, Yeye Huwa na maana ya Kiroho na siyo ya kimwili.

Mfano mzuri wa kanuni hii ni pale Alipokuja Yesu mara ya kwanza kwa Wayahudi. Wayahudi, kutokana na Aya za Taurati, walikuwa wakitegemea kuwa Masihi wao angekuwa mfalme, kuwa angekalia kiti cha babu yake Daudi, kuwa angeamuru majeshi na kutoa sheria. Wayahudi walielewa Aya hizo kwa maana ya kimwili; kwa kuangalia sura ya nje. Walitegemea kushuhudia dalili zote kwa macho yao. Walipokosa kile walichokuwa wakikitegemea, basi walikataa kumtambua na kumtii Mwahidiwa wao.

Yesu mwenyewe alitoa tafsiri kujaribu kuwasaidia wayahudi kutambua Nia ya Aya za Mwenyezi Mungu. Akawaeleza kuwa ufalme Wake haukuwa ufalme wa dunia hii, bali ulikuwa ni ufalme wa kiroho kwenye mioyo ya wafuasi Wake. Akawaeleza kuwa kiti cha babu Yake Daudi kilikuwa ni kiti cha unabii, na kuwa sheria Zake zilikuwa ni za kiroho. Pia akaeleza kuwa majeshi Yake hayakuwa majeshi ya askari bali majeshi ya malaika. Lakini Watu wengi walikataa kumuelewa.

6.3. Kuelewa Neno la Mungu kwa Roho Safi

Biblia inatuonya kutafsiri kiroho na siyo kimwili:

BWANA haangalii kama binadamu aangaliavyo; maana wanadamu hutazama sura ya nje, bali BWANA huutazama moyo. SAMWEL 16:7

Naye ndiye aliyetutosheleza kwa wahudumu wa agano jipya; si wa andiko, bali wa roho; huhuisha. 2 WAKORINTHO 3:6

Na sisi je, tunaelewa utabiri wa kuja kwa Yesu tena kimwili ama kiroho? Tukielewa kimwili, tuko hatarini kurudia makosa yale yale waliyoyafanya watu kumkataa Yesu mara ya Kwanza.

Baha'u'llah anaeleza kuwa, tunaposoma Vitabu vya Mungu, sifa inayohitajika siyo kuwa wasomi sana, bali ni kusoma na macho ya kiroho, na kusikiliza kwa masikio ya kiroho. Tukifanya hivyo tunaweza kuelewa maana ya ishara za siku ya hukumu:

Kwa jinsi hii, fanya juhudi kuelewa maana ya “kurudi” “ufunuo” na “ufufuo” kama zilivyoshuhudiwa katika siku za Mitume wenye asili tukufu, ili uweze kuona kwa macho yako mwenyewe “kurudi” kwa roho ndani ya miili

iliyotakasika na kung'aa na uweze kuliosha vumbi la ujinga, na kuisafisha nafsi iliyo gizani kwa maji ya rehema yatokayo katika asili ya Ilmu takatifu; ili labda utaweza, kwa nguvu za Mungu na mwangaza wa uongozi mwema, kuupambanua Asubuhi ya uzuri wa milele kutoka usiku wa giza la kupotoa. –Baha'u'llah, Kitabu cha Yakini.

6.4 Maana ya Kurudi

Kama tulivyozungumzia kwenye somo la kwanza, Yesu mwenyewe alitoa maana ya 'kurudi' alipokuwa akiwajibu wanafunzi wake kuhusu kurudi kwa Eliya:

Naye akajibu, akawaambia, kweli Eliya yuaja kwanza, naye atatengeneza yote; ila nawaambia, ya kwamba Eliya amekwisha kuja wasimtambue, lakini wakamtenda yote waliyotaka. Vivyo hivyo Mwana wa Adamu naye yuaenda kuteswa kwao. Ndipo wale wanafunzi walipofahamu ya kuwa amesema nao habari za Yohana Mbatizaji.

MATHAYO 17:11-13

“kurudi” kwa Eliya haikuwa na maana ya mwili ule ule wala jina lilelile kurudi, bali ilikuwa na maana ya mtu mwenye tabia na majukumu kama yale ya Eliya. Hapo Yesu anawaeleza wanafunzi wake kuwa wameshindwa kumtambua Eliya kwa kuangalia mwili na jina badala ya roho.

Yesu mwenyewe mara alisema kuwa angekuja yeye mwenyewe, na mara alisema kuwa angekuja mwengine.

Atakuja yeye mwenyewe

Sitawaacha ninyi yatima; naja kwenu YOHANA 14:18

Malisikia ya kwamba mimi niliwaambia, Naenda zangu, tena naja kwenu. YOHANA 14:28

Bado kitambo kidogo nanyi hamnioni; na tena bado kitambo kidogo nanyi mtaniona. YOHANA 16:16

Atakuja mwingine

Hata bado ningali ninayo mengi ya kuwaambia, lakini hamuwezi kuyastahimili hivi sasa. Lakini yeye atakapokuja, huyo Roho wa kweli, atawaongoza kwenye kweli yote. YOHANA 15:26

Kwa maana hatanena kwa shauri lake mwenyewe, lakini yote atakayoyasikia atayanena, na mambo yajayo atawapasha habari yake.

YOHANA 16:13

Katika Kitabu cha Yakini, Baha'u'llah anaeleza kuwa maneno haya yote ya Yesu yana maana moja. Yesu aliposema atakuja mwenyewe ni sawa kwa sababu ni roho ile ile, majukumu yale yale, na tabia zile zile kama Yohana na Eliya. Yesu aliposema ni mwingine pia ni sawa kwa sababu ni mwili tofauti, jina jipya, na ujumbe mpya.

Kwa hivyo, Yesu Mwenyewe, alisema: Nakwenda na Nitakurudieni tena. “Lifikirieni hili jua. Lau lingesema sasa hivi, “mimi ni lile jua la jana,” litakuwa limesema kweli. Na lau lingesema kusema yeye ni jua jingine si lile la jana, kwa hali ya utaratibu wa wakati ulivyo, hata hivyo lingekuwa limenena kweli. Kwa njia hii, ikisemekana kuwa siku zote hizi ni siku moja na za mfano mmoja, ni sahihi na kweli pia. Na ikisemekana kama kwa majina yao mahsusi na maana, zinahitilafiana, hayo pia ni kweli. Kwani ingawa zote ni sawa, lakini mtu aweza kutambua kuwa kila moja ina maana pekee, sifa mahususi na tabia ya pekee yake.

Fikiri basi cheo, mabadiliko, na umoja na Funuo mbalimbali ya namna za pekee katika utakatifu, ili uweze kujua mitajo iliyotajwa na muumba wa majina yote na sifa zote, na uvumbue jawabu la swali lako kwa zile siri za cheo na umoja, na ujiulize kwa nini ule uzuri wa daima ukajilazimisha, katika nyakati nyingi, kuitwa yeye Binafsi kwa majina na vyeo tofauti, Baha'u'llah - Kitabu cha Yakini.

Watu wengine, kwa kutoelewa kuwa kuja kwake tena Yesu, ama Baba kumtuma mwingine zina maana moja, wameshindwa kujua huyu mwingine anayetumwa ni nani. Wengi wametafsiri aya za kuja kwa “Roho ya Kweli” kuwa na maana ya kuja kwa roho mtakatifu wakati wa Pentekosti. Lakini tafsiri hii hairidhishi sana. Kwenye Ufunuo, Yohana anasema mwahidiwa alionekana “Mmoja kama mwana wa Adamu” yaani, ni mwanadamu. Pili, hapo juu. Yesu anasema anayekuja “atanena” na “atashuhudia” kama Yesu alivyoongea, na kutueleza zaidi, siyo kutia pumzi tu. Tatu, ni vigumu sana kudai kuwa Roho Mtakatifu alipokuja wakati wa Pentekosti alituongoza katika “Kweli Yote” wakati bado vitabu vingi vilikuwa vimefungwa na muhuri. Tunaongozwa kwenye Kweli yote kwenye siku ya hukumu ambapo maana ya Vitabu vyote inatolewa.

Kusema anayekuja ni “Roho” haina maana kuwa hatakuwa na mwili. Hata Yesu alikuwa Roho kutoka kwa Mungu.

Yesu alisema:

Kwa maana nawaambia kuwa, Hamtaniona kamwe tangu sasa, hata mtakaposema, Amebarikiwa Yeye anayekuja kwa jina la Bwana.

MATHAYO 23: 39

6.4 Maana ya Kufufuka

Ili kuelewa maana ya “kufufuka” lazima kwanza tuelewe Biblia inavyotumia maneno ya “kufa” na uhai”. Kwa kuwa Biblia inaeleza mambo ya roho na siyo ya mwili, neno “kufa” hutumika kuonyesha kifo cha roho:

Mwingine katika wanafunzi wake akamwambia, Bwana, nipe ruhusa kwanza, niende nikamzike baba yangu. Lakini Yesu akamwambia, Nifuate; waache wafu wazike wafu wao. MATHAYO 8:21-22

Yesu alikuwa na maana acha waliokufa kiroho washughulikie mazishi

Na pia

Nayajua matendo yako, ya kuwa una jina la kuwa hai, nawe umekufa UFUNUO 3:1

Kufa ni kifo cha kiroho, na uhai ni uhai wa kusikia na kutambua Neno la Mungu. Yesu alisema:

Yeye aniaminiye Mimi, ajapokufa, atakuwa anaishi. YOHANA 11:25

Watu wengine wanaona umuhimu wa siku ya ufufuko ni kuwa watu watakaotoka kwenye makaburi ya udongo na kuwa na miili tena. Lakini Biblia inasema kuwa mwili siyo kitu wala siyo kipimo cha uhai:

Roho ndiyo itiayo uzima, mwili haufai kitu... YOHANA 6:63

Baha'u'llah anaeleza kuwa kufufuka ni kusikia, na kupata mwamko kutokana na Ufunuo wa Mungu kwa Siku hii ya Mungu. Ufufuko ni kutoka nje ya makaburi yetu ya ujinga na ukatili na kupokea Hoja ya Mungu.

Muda si mrefu, macho yako yatashuhudia bendera za uwezo wa fahari zimekunjuliwa katika sehemu zote, na dalili za ushindi wake, nguvu na enzi kushuhudiwa katika kila nchi. Ilivyokuwa watawa wengi hawa hufahamu mradi wa aya hizi, na hawakuipata maana ya siku ya Ufunuo, kwa sababu ya ujinga wao huo wamezifasiri aya hizi kwa mujibu wa dhana zao mbovu na zilizopotoka. Mungu mmoja wa haki ni shahidi yangu!

Wangetumia akili kidogo tu wangeweza kupata katika lugha hii ya kimaumbo maana tuliyoikusudia sisi kwa aya hizi mbili, na kwa hivyo, wangepata kwa rehema ya Mungu, mwingi wa rehema, asubuhi ile ing'aayo ya uhakika. Kama hizi ndizo sauti za nyimbo tamu za mbinguni ambazo Ndege wa milele wa peponi, anaimba juu ya Mti mtakatifu au Tawi la Baha' (Nuru), wewe ndiye, unamiminiwa nyimbo hizi, ili, kama Mungu akipenda, uweze kuikanyaga njia ya elimu ya dini kwa hekima bora.

Baha'u'llah - Kitabu cha Yakini

6.5 Maana ya siku ya Hukumu

Yesu Kristo alipokuja duniani mara ya kwanza, kulikuwa na hukumu:

Yesu akasema:

Mimi nimekuja ulimwenguni humu kwa hukumu, ili wao wasioona waone, nao wanaoona wawe vipofu. YOHANA 9:39

Pia, badala ya kuhukumu mtu mmoja mmoja, Yesu alisema mtu kuwa na Imani, ama kutokuwa na Imani ndiyo hukumu yenyewe: *Amwaminiye yeye hahukumiwi; asiyeamini amekwisha hukumiwa...*

YOHANA 3:18

Na pia

Tena Baba hamhukumu mtu yeyote, bali amempa Mwana hukumu yote...Amin, amin, nawaambia, Yeye alisikiaye neno langu na kumwamini yeye aliyenipeleka yu na uzima wa milele; wala haingii hukumuni.

YOHANA 5: 22,24

Yesu mwenyewe anatoa maana ya neno “hukumu”:

Na hii ndiyo hukumu; ya kuwa nuru imekuja ulimwenguni, na watu wakapenda giza kuliko nuru; kwa maana matendo yao yalikuwa maovu.

YOHANA 3:19

Kutokana na mafundisho ya Baha’u’llah, tunaelewa kuwa kuna aina mbili za hukumu. Aina moja ni hukumu ile ambayo kila roho huipata mtu anapofariki dunia.

Pili, Baha’u’llah anaelezea kuwa kila anapokuja Mwahidiwa duniani, kuna hukumu ya watu kwa ujumla. Watu wenye Imani mioyoni mwao wanamtambua Mwahidiwa. Wanafiki na wasio na imani wanamkataa, na hapo tayari watu wanajigawa katika vikundi viwili, kondoo na mbuzi. Kurudi kwa Yesu katika Utukufu wa Baba (Baha’u’llah) pia ni hukumu. Tunapotafuta na kukubali nuru iliyoingia ulimwenguni na Ufunuo wa Baha’u’llah, tunajiweka upande mmoja, na tukikataa nuru hii tumekwisha hukumiwa.

Na sasa fikiri na kumbuka kidogo ukaidi wa watu hawa. Nini kilichoweza kuwa sababu ya ukano kama huu na mwepuko wao? Nini kilichoweza kuwashawishi hata wavue vazi hili la ukaidi, na kujipamba badala yake kwa joho la ukubali? Aidha, nini kiliweza kuwa sababu ya kutokutekelezwa kwa ahadi ile tukufu hata wale watafutaji wakayatupilia mbali yale waliyokwisha kuyakubali? Waza ukiwazua sana, ili siri ya mambo yasiyoonekana yaweze kufumbuka mbele yako, ili uweze kuvuta pumzi za utamu wa manukato ya kiroho

yasiyo haribika, ili uweze kuukiri ukweli ambao tangu zama za zama hata mpaka milele Mwenyezi Mungu amehukumu, na ataendelea kuhukumu Watumishi Wake, ili kwamba mwangaza upambazuke kutokana na giza, ukweli kutoka uongo, jema kutoka baya, mwongozo kutoka upotofu, furaha kutoka msiba, na mawaridi kutoka miiba.

Baha'u'llah – Kitabu cha Yakini

6.6 Maana ya Kumlaki Bwana Hewani

Baadhi ya wakristo wanategemea kuwa Bwana atakapokuja watainuliwa hewani kumpokea:

Kisha sisi tulio hai, tuliosalia, tutanyakuliwa pamoja nao katika mawingu, ili kumlaki Bwana hewani; na hivyo tutakuwa pamoja na Bwana milele,

1 WATHESALONIKE 4:17

Na pia

Wakati ule watu wawili watakuwako kondeni, mmoja atwaliwa, mmoja aachwa; wanawake wawili watakuwa wakisaga; mmoja atwaliwa, mmoja aachwa.

MATHAYO 24:40-41

Wabaha'i wanaelewa aya hizi zote pia kuwa na umuhimu wa kiroho na siyo wa kimwili.

Roho ndiyo itiyayo uzima, mwili haufai kitu YOHANA 6:63

Zote zina maana kuwa watu wengine watawahi kumtambua Bwana Yesu wakati wa kurudi kwake na wengine watachelewa. Watu kuruka angani kimwili haina umuhimu wowote. Kuwahi kiroho kumlaki Bwana wakati bado walio wengi duniani hawajamtambua ni baraka kubwa sana. Hii ndiyo maana ya kumlaki hewani.

Pia Yesu anaposema kwamba watu wawili watakuwa kondeni pamoja na mmoja atachukuliwa na mmoja atabaki, haina maana ya mtu kuondolewa kimwili. Ina maana kwamba utaona watu wawili wakifanya kazi pamoja. Mmoja ameshaingia kwenye ufalme wa milele kwa kuwa amemtambua Baba na mwenzie hana habari.

Wako pamoja kimwili. Kimwili huoni tofauti yoyote. Lakini kiroho mmoja amekubaliwa na kuingia katika ufalme na mmoja bado yuko nje.

Baha'u'llah husema.

Yeyote ambaye amemtambua pambazuko la uongozi wa Mungu na kuingia kwenye ukumbi wake mtakatifu amemkaribia Mungu na kufikia Ukaribu Wake, Ukaribu ambao ni paradiso halisi na ambao makao ya juu kabisa ya mbinguni ni kama ishara tu...

6.7. Jua kutiwa giza, nyota kuanguka, na Ishara Nyinginezo

Ishara za Kurudi kwa Bwana ambazo wakristo wengi wanategemea kushuhudia kwa macho ya kimwili zipo nyingi sana na hatuwezi kuzimaliza hapa. Kwa mfano, Biblia inaposema kuwa nyota zitaiangukia dunia, Baha'u'llah ameeleza kuwa nyota moja tu ina ukubwa mara elfu na elfu ukubwa wa dunia. Hivyo aya hii haina maana ya kimwili. Neno “Nyota” lina maana ya viongozi wa dini ambao walikuwa wakitakiwa kutoa mwanga na kuongoza katika kipindi hiki cha giza (usiku), lakini wamepoteza heshima yao na haki ya kuongoza.

Ni kweli kuwa baadhi ya ishara za siku ya hukumu zinaweza kuonekana na macho kama vile vita zinaonekana hivi sasa. Lakini hata kwa hizo, Baha'u'llah anatukumbusha kuwa maana ya (tafsiri) ya kiroho ina umuhimu na ukweli mzito zaidi.

Maneno haya maana yake ni jua la mafundisho ya mbinguni likitiwa giza, nyota za sheria bora za dini zilizoamriwa zikianguka, na mwezi wa elimu ya kweli ambao ni mlezi wa wanadamu vikitatizwa; kawaida za uongozi na heri zikigeuka, na asubuhi ya ukweli na uadilifu ukizama ndani ya usiku, ndipo ishara ya Mwana wa binadamu itakapoonekana mbinguni. “Mbingu” hapa ni mbingu hii inayoonekana, kwa sababu saa itakapokaribia ya nyota ya mchana ya mbingu ya haki itakapodhihirika, na safina ya uongozi mzuri itakaposafiri juu ya bahari ya fahari, nyota itaonekana mbinguni, kuwahubiri watu wake ujaji wa huo mwangaza mkubwa sana. Kwa jinsi hii, katika mbingu isiyoonekana nyota itaonekana ambayo, kwa watu wa duniani, itakuwa kama mtangulizi wa habari za kuonekana kwa hiyo asubuhi ya kweli na iliyotukuzwa. Ishara hizi za aina mbili, ya mbingu inayoonekana na isiyoonekana, zimetangaza ufunuo wa kila mmoja wa Manabii wa Mungu, kama ujulikanavyo na watu wote.

Baha’u’llah – Kitabu cha Yakini

7. UFALME WA MUNGU DUNIANI

7.1. Mwisho ama Mwanzo?

Je, kurudi kwa Yesu ni Mwisho wa dunia, ama ni Mwanzo wa dunia mpya?

Biblia inafananisha matatizo ya siku hizi na maumivu ya uchungu wa uzazi:

Kwa maana taifa litapigana na taifa, na ufalme na ufalme; kutakuwa na njaa, na matetemeko ya nchi mahali mahali. Haya yote ndiyo mwanzo wa utungo.

MATHAYO 24:7-8

Uchungu wa ‘utungo’ siyo sawa na uchungu wa kifo, maana utungo ni maumivu yanayotokea wakati kiumbe kipya kinazaliwa. Ni mwanzo siyo mwisho.

Kwa kuhofia mateso ya siku ya kurudi kwa Yesu, sisi wengi tunasahau yale mengi tunayopewa kwenye Biblia kuhusu dunia mpya chini ya utawala wa Bwana.

Kama tulivyoanza masomo haya kwa kukumbuka sala ya “Baba Yetu”, Kile ambacho Yesu alitufundisha kukiombea siyo mwisho wa dunia bali ni kusimamishwa kwa ufalme wa Mungu duniani. Kurudi kwa Yesu siyo kumalizika kwa maisha ya binadamu ardhini, bali ni mwisho wa utawala wa zamani na mwanzo wa utawala mpya unaotoka kwa Mungu moja kwa moja:

Katika Agano la Kale:

Na katika siku za wafalme hao Mungu atasimamisha ufalme ambao hautaangamizwa milele, wala watu wengine

hawataachiwa enzi yake; bali utavunja falme hizi zote vipande vipande na kuziharibu, nao utasimama milele na milele.

DANIEL 2:44

Na katika Agano Jipya:

Kisha nikaona mbingu mpya na nchi mpya; kwa maana mbingu ya kwanza na nchi ya kwanza zimekwisha kupita. UFUNUO 21:1

7.2 Serikali itakuwa mabegani mwake

Alipokuja Mara ya kwanza, baadhi ya wafuasi wa Yesu walikuwa wakimtaka Yesu kushika madaraka ya kisiasa. Lakini Yesu alikataa kujiingiza katika shughuli za utawala:

Akawaambia, Basi, vya Kaisari mpeni Kaisari, na vya Mungu mpeni Mungu...

LUKA 20:25

Lakini wakati wa kurudi kwa roho ya Kristo kama Baba wa Milele, tunaambiwa kwamba Mwahidiwa atatawala mataifa yote:

Katika Agano la Kale:

...Maana kwa ajili yetu mtoto amezaliwa, tumepewa mtoto mwanaume; na uwezo wa kifalme utakuwa begani mwake; Naye ataitwa jina lake, Mshauri wa ajabu, Mungu mwenye nguvu, Baba wa milele, Mfalme wa amani. Maongeo ya enzi yake na amani Hayatakuwa na mwisho kamwe, katika kiti cha enzi cha Daudi na ufalme wake; kuuthibitisha na kuutegemeza, kwa hukumu na kwa haki, Tangu sasa hata milele. Wivu wa BWANA wa majeshi ndio utakaotenda hayo. ISAYA 9:6-7

Na pia katika Agano Jipya:

Ni makuu, na ya ajabu, matendo yako, Ee Bwana Mungu Mwenyezi; Ni za haki' na za kweli, njia zako, Ee Mfalme wa mataifa. Ni nani asiyekucha, Ee Bwana, na kulitukuza jina lako? Kwa kuwa wewe peke yako u Mtakatifu; kwa maana mataifa yote watakuja na kusujudu mbele zako; kwa matendo ya haki yamekwisha kufunuliwa.

UFUNUO 15:3-4

Baha'u'llah, kwa kuleta Neno la Mungu katika wakati huu, kwanza analeta mwisho wa tawala duni za kale:

Uzani (utengemano) wa ulimwengu umepinduliwa kwa kupitia nguvu ya kutetemesha ya Utaratibu huu mkuu kabisa wa Ulimwengu, mpya. Maisha yaliyotengemaa ya binadamu yamepinduliwa kwa kupitia nguvu ya Utaratibu huu wa kipekee, na wa ajabu – ambao mfano wake macho ya binadamu hayajawahi kushuhudia.

Na baada ya kutangaza kupinduliwa kwa utaratibu wa zamani, Baha'u'llah amelea Utaratibu mpya, ambao ni Utaratibu wa utawala unaokubaliwa na Mwenyezi Mungu moja kwa moja. Kwenye Kitabu chake, Baha'u'llah ameanzisha utaratibu mpya wa utawala ambao unakuwa na Mabaraza ya kiroho yanayochaguliwa kwa njia za demokrasia katika kila kijiji na taifa, na pia baraza kuu kwa dunia nzima linaloitwa “Nyumba ya Haki ya Ulimwengu”. Baha'u'llah ametoa sheria na kanuni za kuongoza haya Mabaraza katika kuongoza maendeleo ya binadamu.

Sema: Hii ni Mizani isiyoweza kukosa ambayo Mkono wa Mungu umeishika, ambamo wote walio mbinguni na wote waliomo duniani hupimwa, na hali yao kuamuliwa, kama mkiwa kati ya wale waaminio na kuutambua ukweli huu.

7.3 Wanyama wakali kukaa na Wanyama wapole.

Katika dalili za ufalme wa Mungu ambao wengi wanazikumbuka ni utabiri kuhusu wanyama wakali kulala kwa amani na wanyama wapole:

Mbwa-mwitu atakaa pamoja na mwana-kondoo, na chui atalala pamoja na mwana-mbuzi; ndama na mwana-simba na kinono watakuwa pamoja na mtoto mdogo atawaongoza. ISAYA 11:6 na tena ISAYA 65:25

Kwenye kitabu cha Yakini, Baha'u'llah anaeleza kuwa Aya hizi hazina ile maana ambayo watu wengi wanadhania. Bali, zina maana ya kwamba Neno la Mungu na Ufunuo wake vinaweza kuwafanya watu na makabila mbalimbali ambayo walikuwa na uadui mkubwa wa kiasili wapate lishe ya kiroho kutoka sehemu moja:

Tazama, jinsi wale waliozugwa na shetani wa ufanisi, waliotiwa mbegu za kijicho na chuki walivyoongoka na kuungana pamoja kwa ajili ya kutii Ufunuo huu wa ajabu na bora sana, uliowafanya watu wamfuataye kama wametoka tumbo moja..

Hii ndiyo maana ya maneno yale maarufu: “Mbwa mwitu na mwana kondoo watakula pamoja. “(isaya 65:25). Angalia ujinga na upumbavu wao wale ambao, mfano wa mataifa ya zamani ati bado wanasubiri kuona wakati wanyama hawa watakapokula pamoja katika machunga mamoja! Hii ni

hali yao nyonge.

Nadhani, midomo yao haijapata kukigusa kikombe cha ufahamivu, wala miguu yao kukanyaga njia ya haki. Aidha watu wangepata faida gani kama mambo hayo yangetukia? Jinsi yeye alivyosema kweli kwa habari yao: “Wana mioyo lakini hawafahamu, na macho wanayo lakini hawaoni!”

Ishara ya watu na makabila mbalimbali kupata lishe ya kiroho pamoja ni mojawapo katika mathibitisho ya Imani ya Kibaha”i. kwa mfano, kwa karne nyingi waislamu na wakristo wamekuwa kama maadui. Wameuana na kutoheshimiana katika Imani zao. Lakini Mwenyezi Mungu kama Baba bora anataka watoto wake wapataane, na Hataki watumie Imani Yake kama sababu ya ugomvi:

Enyi wana wa watu! Madhumuni ya kimsingi yahuishayo Imani ya Mungu na Dini Yake ni kuhifadhi mambo na kukuza umoja wa jamii ya binadamu, na kuongeza moyo wa urafiki miongoni mwa watu. Msiifanye kuwa chanzo cha mafarakano na ugomvi, cha chuki na uadui. Hii ni Njia iliyonyooka, msingi uliowekwa imara na usiosogezeka, Baha’u’llah.

Ndani ya jamii ya kibaha’i waliotoka katika jamii ya Kikristo na waliotoka katika jamii ya Kiislam, pamoja na Wayahudi, Wabudha na wafuasi wa dini mbalimbali wameungana na kupata lishe moja ya kiroho. Hiyo ndiyo maana ya mbwa-mwitu na mwana-kondoo kulala pamoja katika ufalme wa Mungu.

Matamshi ya Mungu ni taa, ambayo mwangaza wake ni maneno haya: ninyi ni matunda ya mti mmoja, na majani ya tawi moja. Tendeaneni ninyi wenyewe kwa upendo halisi na mapatano, kwa urafiki na uenzi. Yeye ambaye yu Nyota ya Mchana wa Ukweli hunishuhudia! Ni wenye nguvu mwanga wa umoja kiasi kwamba unaweza kuangaza dunia nzima! -Baha'u'llah

7.4 Sheria itatokea Sayuni

Jambo lingine ambalo limetajwa kwenye utabiri wa Biblia kwa siku za Ufalme wa Mungu ni kwamba sheria za Mungu zitatolewa kutoka Sayuni, na kwamba mataifa yote ya dunia yatakuwa yakipata mwongozo kutoka Mlima wa Mungu (Karmel) Israeli.

Lakini itakuwa katika siku za mwisho, ya kwamba mlima wa nyumba ya BWANA utawekwa imara juu ya vilima; na watu na mataifa watauendea makundi makundi. Na mataifa mengi watakwenda na kusema, Njooni, twende juu mlimani kwa BWANA, na nyumbani kwa Mungu wa Yakobo; naye atatufundisha njia zake, nasi tutakwenda katika mapito yake; kwa maana katika Sayuni itatoka sheria; na neno la BWANA litatoka Yerusalemu. ISAYA 2:2-3

Katika imani ya Kibaha'i tunaona kuwa utabiri huu pia tayari umekwishatimia. Baha'u'llah, kwenye Kitabu Chake cha Aqdas (Kitabu Kitakatifu Kabisa), Alitangaza kuanzishwa kwa Shirika Kuu la Imani ya Kibaha'i liitwalo "Nyumba ya Haki ya Ulimwengu". Nyumba ya Haki ya Ulimwengu ni shirika la watu tisa ambao wanachaguliwa kwa kura na Wabaha'i wote wa dunia kila baada ya miaka mitano.

Nyumba ya Haki ina makao yake kwenye jengo zuri na la ajabu la marumaru juu ya Mlima Karmel huko Israeli.

Tayari watu wa kila kabila na asili kutoka kila nchi duniani wanakusanyika na kwenda kwenye Makao Makuu ya Imani ya Kibaha'i huko Israeli kupokea na kusikiliza sheria ambazo zimetungwa na Nyumba ya Haki ya Ulimwengu kwa uongozi wa jamii ya Kibaha'i. Sheria hizi, pamoja na sheria za Baha'u'llah mwenyewe, ni sheria zinazofaa kwa kuendeleza binadamu kwa wakati huu. Pia sheria za Nyumba ya Haki ya Ulimwengu zinaweza kubadilishwa mara kwa mara ili kwenda na wakati.

Kwenye miaka ijayo, binadamu wote watakuja kutambua umuhimu wa shirika la Nyumba ya Haki ya Ulimwengu, na sheria zake.

Baha'u'llah amesema:

Wakati ulioamriwa mbele ya watu na jamaa za dunia sasa umefika. Ahadi za Mungu, kama zilivyoandikwa katika Maandiko matakatifu, zote zimetimizwa. Kutoka Sayuni imetokea Sheria ya Mungu, na Yerusalemu, vilima na ardhi yake, vimejawa na utukufu wa Ufunuo Wake. Ni mwenye furaha mtu yule ambaye hutafakari moyoni mwake jambo lile ambalo limefunuliwa katika Vitabu vya Mungu, Msaada Mashakani, Aliyepo Mwenyewe. Baha'u'llah.

7.5 Maana ya “Kutawala na Bwana”

Wakristo wengi huamini kuwa, wakiwa waaminifu, watapewa kutawala na Bwana” katika Ufalme wake:

Maana watenda mabaya wataharibiwa, bali wamngoja BWANA ndio watakaorithi nchi...Maana mikono ya wasio haki itavunjika, bali BWANA huwategemeza wenye haki. Bwana anazijua siku za wakamilifu, na urithi wao utakuwa wa milele.

ZABURI 37:9, 17-18

Yesu akawaambia, Amini nawaambia ya kwamba ninyi mlionifuata mimi, katika ulimwengu mpya, atakapoketi Mwana wa Adamu katika kiti cha utukufu wake, nanyi mtaketi katika viti kumi na viwili mkiwahukumu makabila kumi na mbili ya Israeli. MATHAYO 19:28

Msiogope, enyi kundi dogo; kwa kuwa Baba yenu ameona wema kuwapa ule ufalme. LUKA 12:32

Je, “kutawala na Bwana” ina maana ya kukalia viti vya dhahabu?

Wabaha’i huamini kuwa “kutawala na Bwana” ina maana ya kukubali kushiriki katika kazi ya kujenga na kuendeleza Utaratibu mpya ulioletwa na Baha’u’llah. Kupewa nafasi na Mwenyezi Mungu kushiriki na kusaidia katika kuujenga ufalme wake ni heshima kubwa sana ya kiroho.

Katika siku ya leo, kutii sheria na maagizo ya Nyumba ya Haki ya Ulimwengu ndiyo kutawala na Bwana, chini ya Utaratibu Wake.

Jihadharini msisitesite katika dhamira yenu kukubali ukweli wa Hoja hii – Hoja ambayo kupitia kwake nguvu zisizodhihirika za uwezo wa Mungu zimefunuliwa, na enzi Yake kusimamishwa. Kwa nyuso zilizo angavu kwa furaha, na enzi Yake kusimamishwa. Kwa nyuso zilizo angavu kwa furaha, harakisheni Kwake Yeye. Hii ni Imani ya Mungu isiyobadilika, ya milele zamani, ya milele wakati ujao, Mwache yeye ambaye hutafuta, aifikirie; na kwa yeye ambaye amekataa kuitafuta kwa hakika, Mungu ni Mwenye kujitosheleza Mwenyewe, juu ya haja yoyote ya viumbe Vyake. Baha’u’llah.

8. VIGZO VYA UKWELI

Je, tunaweza kujua kama madai ya Baha'u'llah ni ya kweli? Mara wabaha'i hukutana na wakristo wanaouliza kama Baha'u'llah anaweza kuwa nabii wa uongo. Yesu hakutuonya juu ya manabii wa uongo bila kutupatia vipimo vya kuwatambua. Tukitumia vipimo hivi tunaweza kuwa na uhakika kuwa Baha'u'llah si wa uongo.

8.1 Manabii wa Uongo watatumia Jina Lake Yesu na Kanisa Lake; watagawa badala ya kuunganisha watu.

Kwa sababu wengi watakuja kwa jina langu, wakisema Mimi ni Kristo; nao watadanganya wengi. MATHAYO 24:5

Na pia

Najua mimi ni kuwa baada ya kuondoka kwangu mbwa-mwitu wakali wataingia kwenu, wasilihurumie kundi, tena katika nyinyi wenyewe watainuka watu wakisema mapotovu wawavute hao wanafunzi wawaandamie wao. MATENDO YA MITUME 20:29-30

Kutokana na Aya hizi, ni wazi kuwa manabii wengi wa uongo hawakuwa watu nje ya kanisa la Kristo bali ni watu na viongozi wa ndani ya kanisa. Hawa manabii wa uongo wametumia jina la Kristo kujipatia nguvu kwa kuwa hawakuelewa kuwa Mwahidiwa angekuja na jina jipya. Hawa ndiyo wanaowajibika kwa hali ya kusikitisha kuwa kanisa la Kristo limegawanyika katika madhehebu yanayozidi elfu tatu.

Watu wengi hufikiri kuwa manabii wa uongo watajitokeza siku za usoni, halafu Yesu atarudi. Lakini manabii wa uongo wameshakuja wengi sana, hata wakati wa maisha ya Mitume wa Yesu:

Watoto, ni wakati wa mwisho; na kama vile mliyosikia kwamba mpinga Kristo yuja, hata sasa wapinga Kristo wengi wamekwisha kuwapo. 1 YOHANA 2:18

Historia ya mafarakano na vita ndani ya kanisa, kugawanyika katika madhehebu, na watu wengi kukosa Imani moja kwa moja, yote ni matunda ya hawa manabii wa uongo. Mkristo hana sababu kufikiri kuwa utabiri wa kuja kwa hawa bado haujatimia.

8.2 Mtawatambua kwa matunda yao

Kwenye Injili, hatujaambiwa kuwa tutashindwa kuwatambua manabii wa uongo. Bali, tunaambiwa kuwa tukiwaangalia kwa jicho la kiroho, tutawatambua:

Jihadharini na manabii wa uongo, watu wanaowajia wamevaa mavazi ya kondoo, walakini kwa ndani ni mbwa-mwitu wakali. Mtawatambua kwa matunda yao. Je! Watu huchuma zabibu katika mibaruti? Vivyo hivyo kila mti mwema huzaa matunda mazuri na mti mwovu huzaa matunda mabaya. Mti mwema hauwezi kuzaa matunda mabaya, wala mti mwovu kuzaa matunda mazuri. Kila mti usiozaa matunda hukatwa ukatupwa motoni. Ndipo kwa matunda yao mtawatambua. MATHAYO 7:15-20

Manabii wa uongo wana tabia mbaya, na hutumia dini kama njia ya kujipatia utajiri na cheo. Tukiangalia maisha ya Baha'u'llah, alizaliwa akiwa mtoto wa waziri mwenye pesa na cheo. Alipotangaza hoja yake, malipo yake yalikuwa ni mateso, umaskini na kufungwa hadi mwisho wa maisha yake.

Matunda ya Ufunuo wa Baha'u'llah ni mafundisho yake ambayo yanasifiwa na watu wengi mpaka maadui zake, na jamii ya Kibaha'i ambayo imeunganisha kwa upendo watu wa asili mbalimbali.

Tukipima kwa haki ni wazi kuwa maisha ya Baha'u'llah, yalikuwa ni mti mzuri wenye kuzaa matunda mazuri.

8.3 Kila roho inayoshuhudia.

Mwisho, kwenye Biblia tunaambiwa kuwa kila roho inayoshuhudia juu ya ukweli wa Kristo imetokana na Mungu:

Wapenzi, msiiamini kila roho, bali ziharibuni hizo roho, kwamba zimetokana na Mungu: kwa sababu manabii wa uongo wengi wametokea duniani. Katika hili mwajua Roho wa Mungu; kila roho ikiriyo kwamba Yesu Kristo amekuja katika mwili yatokana na Mungu. Na kila roho isiyomkiri Yesu haitokani na Mungu. I YOHANA 4:1-2

Baha'u'llah amekiri kabisa ukweli wa Yesu, kuja kwake, cheo chake, na sadaka yake. Kwa mfano, Baha'u'llah ameandika:

Mjue kuwa Mwana wa Adamu (Yesu) alipotoa pumzi yake ya mwisho ya Mungu, viumbe vyote vililia kwa mlio wa uchungu. Kwa kujitoa, lakini, uwezo mpya uliingizwa katika vitu vyote...

Tukitumia vigezo tulivyopewa kwenye Injili tunaweza kujihakikishia kabisa kuwa Baha'u'llah hawezi kuwa nabii wa uongo. Baada ya manabii wa uongo ambao wameshakuja kupoteza na kugawa kanisa la Mungu, Baha'u'llah amekuja na ufunuo mpya wa kuunganisha watu tena. Baha'u'llah hakujipatia cheo wala utajiri bali aliteseka sana kwenye maisha yake ili kutuletea ujumbe huu kutoka kwa Mungu.

9. MASWALI NA MAJIBU

9.1 Imani ya Kibaha'i ni madhehebu ya Ukristo?

Hapana. Imani ya Kibaha'i inatokana na Ufunuo mpya. Imani ya Kibaha'i ni imani mpya kutokana na kurudi kwa Kristo, ina kitabu, sheria na mafundisho mapya kabisa. Hivyo si madhehebu ya dini ya awali bali ni Ufunuo mpya wa kuunganisha dini na madhehebu ya zamani.

9.2 Wabaha'i wanaamini kuwa Yesu ni Mwana wa Mungu na alikuja kutuokoa sisi?

Ndiyo. Kama wakristo, wabaha'i wanaamini yote yaliyoandikwa katika Biblia juu ya wadhifa wa Yesu na maana ya kuja kwake mara ya kwanza. Tunaamini kuwa aliteseka na kufa kwa ajili yetu sisi na kwamba alifufuka.

9.3 Wabaha'i wanaamini kuwa Yesu atarudi katika Utukufu wa Baba?

Ndiyo. Tukisoma Biblia vizuri tutaelewa kuwa anapokuja Yesu kwanza ataonekana kwa wale ambao wako tayari kumpokea. Yesu atarudi kama 'mwivi usiku' ambaye anaingia na kutoka na watu wanashtuka kuamkia kesho yake. Wabaha'i huamini kuwa Yesu ameshakuja kwa jina jipya ila wengi hawajamtambua.

9.4 Wabaha'i wanaamini kuwa Biblia ni Neno la Mungu?

Ndiyo. Wabaha'i wanaamini Biblia na kuwa Biblia ndiyo kipimo cha ukweli wa hoja ya Baha'u'llah.

Pia Baha'u'llah amelea Vitabu na nyaraka zaidi ya mia moja. Hivi vyote kwa pamoja ni 'Kitabu ama Ufunuo wa Imani ya Kibaha'i. Kitabu kikuu cha sheria cha Baha'u'llah kinaitwa Kitab-i-Aqdas (Kitabu Kitakatifu Kabisa): Kitabu kinachofunua Aya na utabiri wa Biblia kinaitwa Kitab-i-Iqan (Kitabu cha Yakini). Maandiko ya Kibaha'i yanapatikana kutoka vituo vya Kibaha'i katika kila nchi na pia katika maktaba.

9.5 Je, Wabaha'i wanabatizwa?

Yohana Mbatizaji aliwaonya watu kuacha madhambi yao ili kuwa tayari kumpokea Bwana. Kwa wale waliokubali, aliwabatiza kwa maji kama alama ya kutakaswa kiroho. Wabaha'i wanakubali haja ya kujitakasa kiroho ili kumpokea Bwana, lakini kutumia alama ya maji siyo lazima tena.

9.6 Wabaha'i wanasali siku gani?

Mbaha'i anapaswa kusali sala za faradhi kila siku. Wabaha'i hawaongozwi katika sala ya makundi ama kusalishwa. Mkutano wa jamii ya kibaha'i wa mara kwa mara ni Karamu ya Siku Kumi na Tisa. Katika Karamu hii, Wabaha'i hukutana kila baada ya siku kumi na tisa katika siku ya kwanza ya mwezi wa Kibaha'i bila kujali imeangukia siku gani ya juma. Karamu yenyewe ina sehemu tatu: kipindi cha kusoma sala na maandiko matakatifu, kipindi cha kujadiliana shughuli za jamii, na kipindi cha viburudisho na mazungumzo ya kirafiki.

9.7 Jamii ya kibaha'i inaongozwa na nani?

Imani ya Kibaha'i haina makasisi kama mapadre au wachungaji. Kwanza kila mbaha'i anawajibika kwa maendeleo yake mwenyewe ya kiroho. Kwa shughuli za jamii, watu wazima tisa huchaguliwa kwa kura katika kila kijiji kuunda 'Baraza la Kiroho la Wabaha'i kila mwaka. Baraza la kiroho huendesha shughuli kama karamu ya siku kumi na tisa, mikutano ya siku takatifu, na kusimamia ndoa. Wajumbe wa Baraza wanashughuli na kazi zao binafsi na siyo waajiriwa. Pia kuna Baraza la Kitaifa. Baraza la Kimataifa huitwa 'Nyumba ya Haki ya Ulimwengu'. Utaratibu huu wa Utawala ulifunuliwa na Baha'u'llah mwenyewe katika Kitab-i-Aqdas.

9.8 Wabaha'i wana makanisa yao?

Kila Mbaha'i anaweza kusali nyumbani kwake, wabaha'i wanapokuwa wengi katika kijiji ama mji wao, mara nyingi wanajijengea kituo ama Baha'i Senta kwa mikutano ya mara kwa mara na Karamu za siku kumi na tisa. Pia, wabaha'i wanajenga Hekalu ambazo ni Nyumba za Ibada. Kwa sasa hivi zipo hekalu nane ulimwenguni, pia zitaendelea kujengwa zingine katika ngazi ya kitaifa na kijiji.

9.9 Wabaha'i hutumia mbinu gani kueneza Imani yao?

Wabaha'i wanatakiwa kutangaza Imani yao kwa mfano na kwa maneno ya upole na ya urafiki. Wabaha'i wanakatazwa kutumia nguvu au mabishano katika kueneza Imani. Kwa kuwa Imani ya Kibaha'i haina makasisi, ni jukumu la kila mbaha'i kufundisha Imani yake.

9.10 Imani ya Kibaha'i imeleta kitu gani bora kwa wanadamu kuliko dini za zamani?

Vitabu vyote vya Mungu vinatoa ahadi kuwa siku ya mwisho wa kipindi watu wote wataunganishwa katika hoja moja ya Mwenyezi Mungu. Ukristo wenyewe sasa hivi umegawanyika katika madhehebu mengi mbalimbali. Umoja wa wanadamu sasa utatokana na Ufunuo wa Baha'u'llah na utaratibu wa mafundisho mapya. Wabaha'i huamini kuwa kuja kwake Baha'u'llah ni mwanzo wa ujenzi wa ufalme wa Mungu duniani. Utaratibu wa Baha'u'llah ndio Yerusalemu Mpya.

10. MASWALI MENGINE

10.1 Yesu Alisema kuwa Yeye ndiye Njia. Tunawezaje kuwaamini Baha'u'llah na mitume wengine tukiamini maneno haya ya injili?

Yesu akamwambia, Mimi ndimi njia, na ukweli, na uzima; mtu haji kwa Baba ila kwa njia ya mimi. YOHANA 14:6

Yesu mara nyingi alitumia mithali kwa kueleza jambo kwa hiyo sisi pia tutaangalia mithali ya kutusaidia kuelewa. Kwa mfano katika kijiji kimoja kunaweza kuwa na mtu ambaye ni baba, na pia ni mume, na hapohapo kazi yake ni mwalimu, na zaidi amepewa kuwa mwalimu mkuu wa shule ya kijiji. Huyu mtu akisema “hakuna mwanafunzi ataruhusiwa kuendelea na masomo ya sekondari bila idhini yangu” tunaelewa kwamba haongei kama mzazi, wala kama mume, wala kama mwalimu wa kawaida. Anaongea kutokana na cheo chake cha mwalimu mkuu wa shule. Ana maana kuwa “hakuna mwanafunzi awezaye kuendelea na masomo ya sekondari bila idhini ya mwalimu mkuu wa shule yake ya msingi” Hata mwalimu mkuu akihamishwa utaratibu utabaki pale pale.

Katika Injili Yesu anaongea na sauti tatu ama akivaa kofia tatu tofauti. Mara Yesu anaongea kama binadamu. Mara anatoa amri moja kwa moja kwa niaba ya Mwenyezi Mungu. Na mara nyingine anaongea kutokana na cheo chake kama kiungo kati ya binadamu na Mungu. Aya hii inaeleweka sana, tunajua kwamba Yesu anaongea (kama Mkuu wa shule) ana maana kuwa “hakuna mtu ataweza kumfikia Mwenyezi Mungu bila kupitia kwa mwakilishi wake hapa duniani,”

Wabaha'i huamini kuwa maneno haya ni ukweli mtupu na kuwa yana maana kwa Yesu kwa wakati wake na pia kwa Wadhihirishaji wote katika nyakati zao. Mungu anapomtuma kila Mwakilishi duniani, lazima tumkaribie Mungu zaidi kwa Njia yake.

Tunapotambua umoja wa wadhihirishaji tunajua kwamba kila kinachotamkwa na kutendwa na mmoja wao pia kinamaanisha wadhihirishaji wote, hasa kwa maana ya kiroho.

Pili, pamoja na kusema kuwa Yeye ni Njia, tunajua kwamba Yesu alituahidi kwamba angerudi mara ya pili kwa jina jipya. Tunapomtambua Yesu katika kuja kwake mara ya pili bado tunamfuata kama Njia.

10.2 Kristo tu amefufuka na Hivyo Yeye ni tofauti na Mitume wote wengine kama Baha'u'llah. – Thibitisho kubwa la Yesu ni kaburi lake tupu.

Hakuna jambo linalosisitizwa zaidi katika injili kuliko kuelewa tofauti ya kuona kwa jicho la 'kimwili' na jicho la 'kiroho'.

Kwa mfano:

Yesu akajibu, akamwambia, kila anywaye maji haya [ya kimwili] ataona kiu tena; walakini yeyote atakayekunywa maji yale nitakayompa mimi [ya kiroho] hataona kiu milele. YOHANA 4:13-14

Yesu akajibu, Ufalme wangu sio wa ulimwengu huu [wa kimwili]. Kama ufalme wangu ungekuwa wa ulimwengu huu, watumishi wangu wangenipigania, nisije nikatiwa mikononi mwa Wayahudi. Lakini ufalme wangu sio wa hapa. Basi Pilato akamwambia, Wewe u mfalme basi? Yeye akajibu, wewe wasema,

kwa kuwa mimi ni mfalme [wa kiroho]. YOHANA 18:36-37

Msitendee kazi kwa chakula chenye kuharibika [cha kimwili], bali chakula kidumucho hata uzima wa milele [cha kiroho], ambacho Mwana wa Adamu atawapa. YOHAN 6:27

Kama ukijumlisha somo hilo kuu, Yesu alisisitiza:

Roho ndiyo itiayo uzima, mwili haufai kitu; maneno hayo niliyowaambia ni roho, tena uzima. YOHANA 6:63

Kama ilivyoandikwa katika Biblia, Ushindi wa Yesu siyo kitu cha kimwili bali ni kitu cha kiroho. Alipofanikiwa kumuua Yesu kimwili, Pilato akajiona kuwa na nguvu juu yake Yesu. Lakini kiroho, Pilato hakuwa na nguvu yoyote. Roho ya Yesu ni Hai na ina nguvu sana. Pilato amekwishaahaulika, lakini Yesu anakumbukwa kila siku na mamilioni ya watu. Ushindi wa Yesu juu ya Kifo ni ushindi wa kiroho. Tukielewa ushindi wa Yesu kama kitu cha mwili wake, tunapoteza maana ya fundisho kubwa la Yesu la kuangalia maana ya kiroho na siyo ya kimwili. Ushindi wake ni ushindi wa Hoja ya Mungu duniani.

Hivyo tunapopima ushindi wa kiroho haifai kujaribu kutumia swala la mwili na mauti kama vigezo vyetu. Kila Mdhihirishaji wa Mungu Ameteseka sana duniani na wengi wameuawa. Lakini kwa kuwa Hoja yao ni Hoja ya Mwenyezi Mungu kila Mmoja yu Hai na wanaishi milele na mamilioni ya wafuasi wao kila siku wanasifu majina yao.

10.3 Tunaelewa kuwa Kubatizwa ni lazima katika Kupata Maisha ya Milele. Wabaha'i wanawezaje kudai kuwa waamini kama hawabatizi na maji?

Kama tulivyosoma juu, tunapaswa kuangalia maana ya kila kitu kiroho na siyo kimwili. Katika Injili ya Marko, tunaambiwa kuwa ubatizo wa Yohana ulikuwa ni ubatizo wa toba:

Yohana alitokea, akibatiza nyikani, na kuhubiri ubatizo wa toba uletao ondoleo la dhambi. MARKO 1:4

Kubatiza na maji ni alama ya kitendo cha kujitakasa kiroho. Kama tunavyoondoa uchafu wa kimwili kwa kuoga na maji, pia tunatakiwa kuondoa uchafu na kutakasa roho zetu ili kuwa tayari kupokea Neno la Mungu. Kumwagiliwa Maji yenyewe hayana umuhimu kiroho, bali ni alama ya kitendo cha kiroho. Yohana mwenyewe alieleza kuwa kubatizwa na maji haina umuhimu kama kupokea Roho Mtakatifu, na kwamba utaratibu ungebadilika:

Akahubiri akisema, yuaja nyuma yangu aliye na nguvu kuliko mimi, ambaye mimi sistahili kuinama na kuilegeza gidamu ya viatu vyake. Mimi niliwabatiza kwa maji; bali yeye atawabatiza kwa Roho Mtakatifu MARKO 1:4, 7-8

Hivyo wabaha'i wanakubali kabisa kitendo cha kiroho ambacho ni kiini cha ubatizo. Tunaposhuhudia nia yetu ya kubadilika ili kufuata amri za Mwenyezi Mungu tunajitakasa kiroho. Kwa siku ya leo watu wanaweza kuelewa umuhimu wa kujitakasa kiroho bila kutumia tena maji kama alama.

10.4 Mbona Wabaha'i hawajaokoka?

Kama tulivyoona juu, Biblia inasema kuwa Yesu atarudi kama mwivi usiku na kuwa watu wengi watakataa kumfungulia mara anaporudi. Ni jukumu la kila Mkristo wa kweli, kujiandaa, kutumia bidii, kunyenyekea, kupeleleza na kuomba kuwa miongoni mwa wale ambao watakubaliwa na Bwana wao Atakapofika. Tunapofaulu katika mtihani huu mkuu ndipo tunapookoka.

Basi, jiangalieni, mioyo yenu isije ikalemewa na ulafi, na ulevi na masumbufu ya maisha haya; siku ile ikawajia ghafla, kama mtego unasavyo; kwa kuwa ndivyo itakavyowajilia watu wote wakaao juu ya uso wa dunia nzima. Basi kesheni ninyi kila wakati, mkiomba, ili mpate kuokoka katika hayo yote yatakayotokea, na kusimama mbele ya Mwana wa Adamu. LUKA 21:34-36

11. MUHTASARI

Je, ni kwa nini Yesu ametuonya mara nyingi kuwa tayari kumtambua na ‘kumfungulia mara’ atakaporudi? Alituonya kwa kuwa alijua kuwa watu wengi kati ya wale wanaojiita watumishi Wake, wangeshindwa kutambua sura Yake mpya.

Kuna wanaoamini kuwa watamtambua Yesu kwa sababu ya kuhudhuria kanisa Fulani, ama kwa sababu wanajua kukariri Aya za Biblia sana, ama kwa kuwa wanajiamini kuwa na uhusiano wa karibu zaidi na Yesu. Sawa, inawezekana. Lakini tuangalie watu waliowahi kumtambua Masihi wakati wa kuja kwake mara ya kwanza. Waliokuwa wamekariri sana aya za Torati walishindwa kumjua na Yesu aliwahukumu kuwa ‘wanafki’. Walioweza kumtambua walikuwa wavuvi wa samaki, mkusanyaji wa kodi, na hata Makahaba!

Katika hadithi ya Karamu ya Harusi (LUKA 14:15). Yesu anatabiri kuwa wakati wa kuja kwake mara ya pili itakuwa hivyo hivyo.

Basi aliposikia hayo mmojawapo wa wale walioketi chakulani pamoja naye alimwambia, Heri yule atakayekula mkate katika ufalme wa Mungu. Akamwambia, Mtu mmoja alifanya karamu kubwa akaalika watu wengi, akamtuma mtumwa wake saa ya chakula awaambie wale walioalikwa, njooni, kwa kuwa vitu vyote vimekwisha kuwekwa tayari.

Wakaanza wote kutoa udhuru kwa njia moja. Wa kwanza alimwambia, Nimenunua shamba, sharti niende nikalitazame; tafadhali unisamehe. Mwingine akasema, nimenunua ng’ombe jozi tano ninakwenda kuwajaribu, tafadhali unisamehe. Mwingine akasema, Nimeoa mke, na kwa sababu hiyo siwezi

kuja... basi yule mwenye nyumba akakasirika, akawaambia watumwa wake, Toka upesi, uende katika njia kuu na vichochoro vya mji, ukalete hapa maskini, na vilema, na vipofu, na viwete... maana nawaambia ya kwamba katika wale walioalikwa, hapana hata mmoja atakayeionja karamu yangu. LUKA 14:15-21, 24

Wanaokaribishwa katika karamu ya ufalme wa Mungu watakataa, na halafu Bwana ataamuru kuwa watu wengine waalikwe kuingia. Wanaokaribishwa kwanza ni wakristo wenyewe. Je, utaingia katika ufalme na jamii mpya ama utakataa? Anapokuja Bwana, kipimo cha imani yako ni uwezo wako wa kumtambua na kumfungulia mara mlango wa moyo wako unapogongwa.

Wafuasi wa Injili, tazameni milango ya mbinguni imefunguliwa wazi. Yeye aliyepaa huko sasa amekuja. Sikiliza sauti yake ikiita kwa nguvu juu ya nchi na bahari, ikitangaza kwa binadamu wote..."tahamakeni, ahadi takatifu imetimia, kwa kuwa Yeye, Mwahidiwa, amekuja"
- Baha'u'llah.

VITABU VYA MAREJEO NA KWA TAARIFA ZAIDI

1994. “*Maandiko Matakatifu ya Mungu Yaitwayo Biblia*” na Bible society of Tanzania, P.O.Box 175, Dodoma, Tanzania, pamoja na Bible society of Kenya, P.O.Box 72983, Nairobi ,Kenya.

1980. “ *New Keys to the Book of Revelation*” na Bibi Ruth Moffet. Mchapishaji: Baha’i Publishing Trust, P.O. Box 19 New Delhi, India.

1981. “ *Thief in the Night: the Case of the Missing Millenium*” na Bwana William Sears. Mchapishaji: George Ronald, 46 High street Kidlington, Oxford, UK.

1990, “ *A Study of Baha’u’llah’s Tablet to the Christians*” na Bwana Michael Sours. Mchapishaji: Oneworld Publications Ltd. 185 Banbury Road, Oxford, OX2 7AR, England.

1990. “*Maandiko matakatifu ya Kibaha*”i kwa Aina Mpya ya Watu Mchapishaji: Baha’i Publishing Agency, Nairobi, Kenya.

1991. “ *Understanding Christian Beliefs*” na Bwana Michael sours. Mchapishaji: Oneworld Publications Ltd. 185 Banbury Road, Oxford, OX2 7AR, England.

1991. “ *The Prophecies of Jesus*” na Bwana Michaele Sours. Mchapishaji: Oneworld Publications Ltd. 185 Banbury Road, Oxford, OX2 7 AR, England.

1992. *Thy Kingdom Come: A Biblical Introduction to the Baha’i Faith*” na Bwana Thoma Tai-Seale, Mchapishaji: Kalimat Press. Los Angeles, USA.

1992. “ *I Shall Come Again*” na Bwana Hushidar Motlagh. Mchapishaji: Global Perspective 1106 Greenbanks Dr. Pleasant, Mi 48858 USA.

1993.” *Prophecies in Harmony*” na Bwana Nabil Nanna. Mchapishaji: Baha’i Publishing Agency, Nairobi, Kenya.



S.L.P. 585, Makongo Juu, Dar es Salaam, Tanzania.

Simu: +255-685 637 422

Barua Pepe: secretariat@bahai.or.tz, literature@bahai.or.tz

ISBN 978-9976-5251-5-1



9 789976 525151